

HISTORY OF ISRAEL

Paominlen Kipgen (PK) M.Th

THUMAKAI

Ipi Dinga Israelte Thusimhi Simngai Ham?

Pathen'in Israelte ipi dinga ana lhena, iti vai hung kipoh'uva, Pathen thu aman tenguleh ichana vangbohna changuva, Pathen ahet jilou tenguleh ichan sanga jepna changuvam? Israelte thusima kona hi Pathen'in iti dana mihemte ahin kimudoh sah'a, Israel nam khat mangcha'a Pathen'in akhang khanga anatoh aphon doh'am? ti hetchetna dinga Israelte thusim hi sim ngai ahi.

Bible sung atamjo hi Israelte thusim leh Pathen'in Israelte chungu anatoh naho jeng ahijeh'in Israelte thusim phatah'a hethem michun Bible hi ahethem jeng thei ahi. Hijeh'a hi hetlouva akhoh tolhona Israelte thusimhi simngai ahi.

Chuleh Israelte thusim isumuva konna eihon jong Pathen toh kinaicha, kihethem to'a, Pathen lungdei banga ihin theina dinguva, chuleh Pathen lung ito louleu Pathen'a kon jepna – Pathen lungdei banga ichonuleh vangbohna akichange ti ihetdoh na dinguva History of Israel hi sim khoh khoh ngai ahi.

ISRAEL HILCHETNA

Israel kiti hi Pathen toh kibonpa ahilouleh Pathen ana tahsan joupna tina ahi. Hebrew mite kiti jonghi gallang khatna cheng ahiloule gamchom mi tina ahi (I Sam. 4:6,9). Hebrew mite chu Jews/Juda mi tin jong akihei (Est. 3:6; Ezr. 5:1,5).

KOI KOI CHU ISRAEL TI'A KIHE HAM?

1. Mi khat min: Jacob chu Israel tin ahung kikhele (Gen. 32:28)
2. Insung khat min: Jacob chilhah phung 12 ho (Gen. 49:16,28; 42:5)
3. Lenggam khat: Sahlam lenggam chu Israel tin ahung kihei (I Sam. 11:8)
4. Pakai Christa tahsanho chu Israel thah tin akihei (Gal. 6:16; Rom. 2:28,29).

PATHEN'IN IBOLLA ISRAEL ANA LHENHAM?

1. Pathen'in Israel mite hi chitin namtin phungtina mijousen Ama ahethdoh nadinguva ana lhen ahi. Leiset chungu mijousen Pathen ahethna dinguva alhacha dinga (missionary/evangelist) a pangding; Vannoija semthu Pathen tamtaho lah'a Pathen dihtah khatseh aume ti vannoija hettohsah'a pang dinga (2 Kgs. 5:13; Deut. 18:10; 6:4,5; Isai. 43:10-12; Josh. 2:1) ana lhen ahi.

2. Vannoi huhhingpu Christa hungpena dinga analhen ahi. Israel'a kon Christa pengding, Christa jala vannoi huhhingna changding, atahsan jouse hing ding ahin; ahin abul chu Israel'a kipan ding ahi.

3. Pathen'atong ding le athu ching tup ding (Deut. 4:4-8; Rom. 3:1-2).

4. Pathen dihtah hou le ajena pan hi hamphatna ahi ti vetsah le hettohsah dinga (Deut. 33:27-29; Josh. 2:11) ana lhen ahi.

BUNG – 1

ISRAELTE HUNG KIPAT

Israelte thusim hi Pathen'in Abraham namkhat Pa dinga akouva kipan ahi (Gen. 12). Gen. 1-11'a kon ihet doh theiju chu Israelte hi nam masapen ahipouve. Ahin Pathen'in ami lungsetna'a atumbek'a Abraham chu Ama'a dinga akou ahibouve. Archaeological studies in Israelte kikou masangin khantouna nasatah tah anaume ati. Tekahnan, Cave Dweller in the Ancient near East 10.000 BC; Khopi luipen Jericho chu 8000 BC vella ana kisa ahitai. Mesopotomia Civilization (khantouna) chu 5000 BC vel ahitai. Egypt Civilization jong 4000 BC laipeh ahitai. Hiti'a chu Pathen'in Abraham masangpek'a pat na anatohsa ahitan, ahin Abraham'a pat athah'a na ahintoh joh ahi. Pathen'in Abraham le achilhah te athahbeh'in giltah'in akihetdoh sah'in, chuleh amaho'a pat midang in jong ahin hetdiu adei ahi.

THE PATRIACH (PATEHO)

1. ABRAHAM (2165-1990 BC)

Abraham thusim hi Gen. 12-25 sunga akimun ahi. Pathen'in amasan Abraham hi thupéh (command) apen, abanin kitepna (promise) aneipin ahi (Gen. 12:1ff). Pathen'in Abraham hi Canaan gam sung pek dinga ana teppek ahin, hinlah kel lah jah'a Egypt gama analut jeng vangin jong hikoma kon chun boina jah'in ahung pot thouthouve (Gen. 12:10-20). Abraham achiing'in sottah cha neilouvin aumin ahi. Hiche khanglaija chondan chu Pasal khat chaneilouva auma ahileh anei agouho chu asoh ho lah'a adeisah penpen khat chang ji ahin. Hijeh'a chu Sarah'in asoh nu Hagar chu cha ahinpek dinga Abraham chu apeh ahi. Ahin hijeng jong chu Pathen thilgon ahidehpoi (Gen. 17:15-19). Pathen'in ateh nunghon hijeng jongleh akitepna bangin chapa khat apehonin hichu Isaac ahi (Gen.26:1-18).

Pathen Leh Abraham Kikah'a Kitepna: Pathen'in Abraham akou hin Pathen'in phatthei kaboh ding nahi ti'a akitepna bana Abraham'in ajui ding jong aumin ahi. Hiche ho chu Pathen'in atep pek ho achan theina dinga Abraham in ajui tei ding ahin, hiche ho chu hop 4 (li) in akihom khen theije.

- A. Pathen thu chu mihem lunggela ahithe louding hijongle atahsan tei tei ding (Gen. 15:1-6; 18:10-14).
- B. Pathen thu angaiding, agam, anam chuleh a'insung adalah ding (Gen. 12:4; Heb. 11:8).
- C. Chonphat na hinkho amanding (Gen. 17:1-3). Hiche hin avetsah chu Pathen'a konna chanding ho hi moh'a kimu ahipon mihem lama kona jong bolding leh juiding aume.
- D. Abraham henga Pathen akitep hi Abraham insunga achilhahte seh hilouvin Abraham tahsan banga hin tahsan dingho, chule Christ nungjuiho chu Abraham chilhah'a simtha ding chuleh chan aneikhom diu ti ahi (Gen. 12:3; Gal. 3:7,14,16)

Abraham in Pathen atahsana hi thungai (natoh) in avetsah'e (Gen. 15:6; Rom. 4:1-5,16-24; Gal. 3:6-9; Heb. 11:8-19; John. 2:22). Hichu tahsan dihtah ahin, Huhhinga umtheina dinga tahsan chu ahi.

Palistine Gam: Pathen'in Abraham leh achilhah te pehdinga anatepna gam chu Palistine gam kiti ahi ahi. Hiche hi adung mile 150 vel chuleh avai mile 50 vel bou ahin, hinla gamphatah ahi. Hiche gamhi Egypt te, Babylon te, Assyria te, Persia te chuleh Rome te chenna mun ahi. Hiche gama hi Pathen'in Israelte achensah ahi.

Bible sunga thil soh atamjo le thupi tahtah hohi hiche gama soh ngen anahi. Hiche gam hi kiminsahna tampi aumin, hiche ho chu:

- A. Canaan gam (Gen. 11:31; 17:8; 23:2; Acts. 13:19).
- B. Hebrew te gam (Gen. 40:15)
- C. Judate gam (Acts. 10:39)
- D. Israelte gam (I Sam. 13:19)
- E. Gamtep gam (Heb. 11:9)
- F. Gamtheng gam (Zech. 2:12; Gen. 13:14-17; Isai. 7:18; Gen. 22:17) – Hiche gamhi Judaism, Islam leh Christianity hung kipatna gam ahi.
- G. Pakai gam (Hosh. 9:3)
- H. Immanuel gam (Isai. 8:8)
- I. Jat sagi ho gam (Hitt mite, Girgashite gam (Gen.15:16,21), Amon mite, Canaan mite, Periz mite (Deut. 7:1), Hiv mite, chuleh Jebus mite (Acts. 13:19; Gen. 15:18,21).
- J. Pakai jin akhohsah na gam (Deut. 11:12)

Hiche gam neocha hi twikhanglen le nelgam kah'a um ahijeh'in peltheilou mun, gam tampi'in ajotpa teiteiju gam ahi. Hiche gam'a acheng masapen hi Canaan mite hidin ginchat aume. Amaho hi Israelte Egypt gama kona ahung kile lamu chun dettah le hoitah, chuleh khangtou tah anahi taove.

2. ISAAC (2065-1185 BC)

Abraham'in cha adang dang jong aneijeng vangin Isaac hi athupi pen ahi. Ajeh chu Isaac'a konna bou Pathen thutep chu guilhung ding ahi. Abraham'in athi masangin achapa Isaac ji ding agontup peh'in, asohpa in numei phatah Pathen'in agonpeh Rebekah chu agapuipheh'in, Isaac leh Rabekah in chapa ni anei honnin Esau leh Jacob ahi.

3. JACOB (2005-1858 BC)

Esau hi mi upa ahi jeng vangin Pathen'in anaopa Jacob joh athutep guilhun na dingin alhengin Jacob'a konin ISRAEL ahin sah'in (Gen. 32:28), Jacob'a konin ISRAEL phung 12 ho chu ahungpeng doh'un ahi.

4. JOSEPH (1914-1804 BC)

Joseph hi Jacob in aji Rachael toh ahin masatpen hon ahin ahi. Amang alamdan thu aseijeh'in a'uten Ishmael mite koma ajohdoh'un, Ishmael miten Egypt gamma ajoh'un ahi (Gen. 37). Ahin hichu Pathen lungdei lam joh anahi (Gen. 45:5). Joseph in chapa ni aneijin Manasseh leh Ephraim ahin, ani honnin Israel phung 12 lah'a akisim tha lhonin ahi.

BUNG – 2

EXODUS (1445 BC)

Genesis in Israel mite Egypt gamsunga alut uleh Joseph thi thu'in ajouvin, Exodus, Leviticus, Number leh Deuteronomy in Egypt gama sohchanna'a kon ahung pot'uva Pathen'in ahin puidan thu aseijin, mihem lhomcha'a kon nam lhingset ahung so'u thu imu theijun ahi.

1. MOSE (ca. 1525-1405 BC)

Egypt miten Israel chapang pasal peng jouse atha jing laijun Mose hi Levi phunga ahungpenge (Ex. 2:1ff). Ahin amahi Egypt leng insunga ahung khanglenin (2:10), Median gamsunga Egypt mikhat atha jeh'in aga jam mangin (2:11-15), Gamthipma akelngoi chin na'a Pathen'in akimupin kouna achange (Ex. 3). Hichun Mose'in Pathen'in ateppeh/thupeh cheng atahsanin, Israel mite huhdoh dia akisol na chu anomtai. Pathen'in Moses ateppeh ho chu Israel miten 'kon nahinsol ham?' ati tenguleh ahin sol'a asehi na dingin amin "KAHI DINGCHU KAHU JING DING (I AM WHO I AM)" 'in eihin sol ahi atidin aseipeh'in;' hichun tonsot'a umjing le tonsotna umjing ding kikheltih neilou Pathen seinah. Anina'a Pathen'in Mose alampi'a apui hoile'a Pathen thaneina avetsah nading "Pathen thahat, thilbol theina atenggol" chu apen ahi (Ex. 4:3,6).

Ahin Pharaoh'in Israelte soldoh ding anoplou jalin, Mose'n Pathen'a konin thil kidang, natna hise som Egypt gamsunga alhun sah'in (Ex. 7-12) ahi. Egypt mite gel danna chu hitobang hise hohi ahunglhun teng a-pathen'u achunguva lunglhai lou leh lunghang ahi ati uva alung lhaigot tei jiu ahi. Ahin asomna pa'in vang Israel mite chu ahinsol doh tai.

Masanga Pute/mimasaho (patriarch) ho khang chu Pathen chu changval chungu bou kisalela ana gelu ahin, ahin Exodus'a kon Israel miten aheth'u chu: Pathen hi ahingel doh'u pa goh hilouva, Japi khohsah leh ngaisah Pathen ahi ti ahi.

2. ISRAELTE KHOLJIN (Chronology of the Exodus)

- i. Potdoh (exodus) Ex. 12
- ii. Sin gamthip alhun nu (Ex. 16)
- iii. Sinai gamthip alhunu (Ex. 19)
- iv. Houbuh/lhambuh (tabernacle kitun Ex. 40:1,17)
- v. Maicham (altar) kilhandoh (Num. 7:1)
- vi. Levi ho kikatdoh (Num. 7:1)
- vii. Kalchuh kut kiman (Num. 9:5)
- viii. Min kilah (census) Num. 1:1,18)
- ix. Kalchuh kut kiman dol kihil (Num. 9:11)
- x. Sinai'a pat akipat doh'u (Num. 10:11)
- xi. Zin gamthip'a achammu (Num. 20:1, 1:22-29; 33:38)
- xii. Aaron thi (Num. 20:22-29; 33:38)
- xiii. Mosi thusei/thuhil (Deut. 1-33)
- xiv. Mosi thi (Deut. 34).

3. CANAAN GAM ALO'UH

Israelte gamthip'a sot tah avai tham nungun Pathen'in akhonan Canaan gam alo sah'un ahi (Josh. 21:43ff). Palestine gam ti'a ana kihe khu masanga Canaan gam anahi. Canaan gam hi gam khangtoug tah leh sangtah'a khangtoug anahin, akhopiu jong hoitah'a pal kikai jeng thupi tahtah'a kibol ahi. Canaan mite Pathen chungnung chu "El" akitin, ahin amahon "Baal" joh aha houvui. Amahon Baal titah louvin pathen nu (goddess) dang dang jong aneijun, hiche ho chu Asherah, Astarte, Anath kitiho ahi. Agamsunga mite chu Pathen aheth'ouva anachon thangbeh set jeh'ouva Pathen'in Israel mite anapeh doh ahi. Hiti chun hiche gamsung chu Pathen lhachapa Mose thi nungin Pathen'in Joshua chu

mipite lamkai dingin atungdoh'in, Joshua lamkaina Canaan gam chu Israelten alo'un, agamsung chu aphungkhai dungjui jin Joshua in ahop peh sohkeijin, Canaan gamsung chu atoupha taovin ahi.

4. THUTAN VAIHOMHO PHAT SUNGA ISRAELTE KIDOUPI NAMHO

i. **Philistine Mite:** Philistine te'a konin Israelte nivei huhdoh'in ana umun ahi. Philistine te'a kon ana huhdoh uva thutan vaihom teni chu: Shamgar (1150 BC) – Judg. 3:31; chule kum 50 jou tobang nunga Samson (Judg. 13:1-16:31) ahi. Amani hi japi lamkaija gal bol sangin changvala galbol/ galsat ahi lhonin ahi. Philistine te asuh mang lhon louvangan nasa tah'in asugep lhonin asuse lhone.

ii. **Canaan mite:** Deborah (1125 BC) in Israelte Palistine gam lailung leh sahlung (Centre & North) ahin tildoh'in Canaan mite to Esdrainlon Phaichama akisatnun Israelten nasa tah'in ajouvui (Judg. 4-5).

iii. **Aramaic pao tho miho:**

a. Othniel (1200 BC) in Edom lengpa ajouvin (Judg. 3:7-11)

b. Ehud (1175 BC) in Moab lengpa athatnin (Judg. 3:12-30)

c. Jephthah (1050 BC) in Amon mite ana jouvin (Judg. 10:6ff)

iv. **Median leh Amalek mite:** Gidion in Median le Amalek mite ana jouvin ahi (Judg.6:1-8:34).

BUNG – 3

LENG, THEMGAO LEH THEMPU

1. LENG

A. Pathen Leng Vaipoh (Theocracy):

Israelten Canaan gam alo uva pat lenggam dana aum jeng vangun achunguva leng dinmun na vaihom'a chu Pathen anahi. Pathen'in ama ho lah'a thutan vaihom ho atun doh peh'in, amaho'a pan san vai ahomjin ahi. Thutan vaihom ho lah'a anukhah pen chu Samuel ahi. Thutan vaihomho phat sungin Pathen'in Israel chaten alung ato uva ahiteng akhan tousah'in, achonset uva alung ato lou tenguleh midang khutnoiija akoijin ahi.

Ahin akhonnann Israelten gamdang banga lenga kivaihom ding ahinsom taovin ahileh hichun Pathen leh Samuel alung himo sahlleh jenge (1 Sam. 4-9). Ajeh chu Israelte chungga Pathen leng ana hitah jal chun Israelten leiset leng adeiju chun Pathen hi aleng diuva adeilou'u avetsah ahi. Ahin Pathen'in achunguva lengvai homdingin leng apetan ahi.

UNITED KINGDOM (Lenggam kipunkhom)

1. **SAUL (1052-1011 BC – 1 Sam. 8-31):** Israelte chungga lengvai podingin Pathen'in Saul atundoh pehtai. Israelten Saul leng thaneina chu apomlkeh uva, chuleh Amon mite leh Philistine te chungga Saul'in gal jona anei jeng vangin, Israel gamsunga cham na tahbeh ahin lhut dehpoi. Saul lengvai poh sung sesechu galdouna ngen ahi. Philistine mite chu Israelte din boina ahi jingin chuleh Philistine gamsunga melma tamtah tah'in boina abol jingui. I Sam. 15 sunga Saul in Amalek miteto akisat naova Pathen lung ato jou tah loujeh'in, Samuel in Saul chu Pathen mitmu'a lhin joulou leh paidoh ahi thu aseipeh'e (I Sam. 15:22,23; 13:14,15). Saul lengvai poh chu Philistine ten Israelte avela ahin sat kitnun, ama leh achapate athi to lhonin akichaitai (I Sam. 31:3,4)

2. DAVID (1011 – 971 BC – 2 Sam. 1:1-24:25; I Kgs. 1:1-2; I Chr. 19:14-29:30).

David in Hebron'a kum 7 sung Judate chung a lengvai anapon, Jerusalem ah Israel pumpi chung a kum 33 sung apo'in, agoma aleng chan phatsung chu kum 40 ahi. Saul thi nunga David in kum 7 Hebron na Judate chung a leng ahi lai jin Israelte chung a Saul chapa Ishboeth'in lengvai apoi. Israel thusim'a leng jouse lah'a David hi alolhing pen le aminthang pen ahi jinge. Aman tahsa kivai poh nalama galjona anei goh hilouvin (2 Sam. 1:1-5:25; 8:1-10:19), Lhagao lam jenga jong galjona leh halna ahin lhutne (2 Sam. 6:1-7:28; 1 Chr. 13:1-17). Achonset jeng vangin jong Pathen henga ngaidam athumin akisih paijin ahi (2 Sam. 11:1-27).

3. SOLOMON (971-931 BC – 1 Kgs. 2:12-11:43; 1 Chr. 29:20-30; 2 Chr. 1:1-9:31).

Solomon leng ahung hi hin Israel lenggam hi hat tah anahitan, melma jong lhomcha bou aneiju ahitai. Solomon'in aleng gam hatna leh detna dingin khopi galmin abulu bai theina munho chu hoitah'in pal agenin (I Kgs. 9:15-17); Israelte lah'a sakol kangtalai ahin mang panin (I Kgs. 4:26); akim vella lengho toh kinoptona abolin, hiche kinopto na chu adet nadingin achanu'u (Lengchanu) ho akichen pi'e (IKgs. 11:1-5). Aman Jerusalem houin asa'in (I Kgs. 6), galmanchah koina ding in, agou kholna ding in, thutan na in ding leh leng in ni jong asai (Igs. 7:2-8). Hiche ho goh hilouvin aman gamdang pathen houna in ding jong asai (I Kgs. 11:7). Solomon in amite chung a kai tampi pi adongin, Samuel in ana seisa bangin, "Leng nanei tengu leh hitobang bang hung lung ding ahi" atiho chu aguilhun sah soh'e. Solomon in ahinkho kichai lamin Pathen asumilin, jatdang pathen ahou tan ahileh hichun Pathen aphin lunghangin, Pathen'in adou ding ahin tamsah cheh cheh'e (I Kgs. 11:1-40). Akhon nan aleng gam jeng jong achapa khangah keh ni akison: Israel leh Juda tin akikhen lon ahi. Solomon in adamsungin ji 700 leh thaikem 300 aneije (I Kgs. 11:3).

DIVIDED KINGDOM (Lenggam kihopkhen)

Solomon lengpa thijouvin Hebrew lenggam hopnin akihom tan ahi. Khat chu sahlam lenggam (northern kingdom); Israel lenggam tin akihei. Sahlam lenggama dinga lengpa chu Jeroboam ahin, phung 12 lah'a 10 in abelui (I Kgs. 11:13-36). Lenggam khatjoh chu Lhnglam lenggam (southern kingdom); Juda lenggam tin akimin vo'in, Solomon chapa Rehoboam'in lengvai apon ahi. Israel phung 12 lah'a phung 2 (Juda leh Benjamin) in abele (I Kgs. 11:13,32). Hiche lenggam kihopkhen na jeh hi Solomon lengpa in milim ahou jeh'a Pathen lunghan na akon kibol ahi (I Kgs. 11:9-13:31).

ISRAEL LENGAM

Solomon lengpan amite ho'a konin kai tampi analan ahi. Solomon thinungin achapa Rehoboam chu Israelte leng ding chu ahitan ahin Israel upahon Rehoboam henga ahungun apa Solomon'in kai tampi pi adon chu alhomsah jep dingin ahung ngeh taove. Ahin athumop (advisor) hon atamjo cheh'a lahding'a Rehoboam atilset phatnun, aman jong atamjo cheh lah ding atep tai. Hiche kai tampi pehding deilou jeh chun phung 12 lah'a phung 10 ho chun Rehoboam khel dingin Jeroboam kiti pa chu alengdiuvin akilhen taovin ahi. Hitichun Jeroboam chu phung 10 ho leng ahung hitai. Aman amunpi dingin Sechem ahin kigon tan, ahinlah Pharoah Shishak lengpa'a kona gal bulu'a ana aumjing jeh'in Panuel kitimun na chun akichon tai (I Kgs. 12:25, 14:17). Phat chomkhat joukitnin Samaria khopi'a akhel'in hiche mun chu a khopi (capital) ahung hitai (I Kgs. 18:24-29).

Israel lenggama chengho chu Pathen anahou jinao Jerusalem'a Pathen houdia ache tenguleh Jeroboam hin Jerusalem chu Juda lenggam'a munpi ahijeh chun amiteho chu Pathen houva achenaoa Jerusalem lam'a chengden unte ti atijat jehchun achediu aphal peh tapoi. Jerusalem'a

Pathen houva achena louna diuvin bongnoulim asemin, hichu Bethel le Dan khopi'a akoiijin, amite chu ahousah tan ahi (I Kgs. 12:26-33).

Hiche Jeroboam lengpan amite milim ahousah hi Israelte thusim'a chonsetna lentah in akiseije (I Kgs. 13:34; 15:30-34; II Kgs. 10:29; 13:6; 14:24; 17:22). Achaina'in Ahijah themgao, Jeroboam leng dinga analhengpa jeng jong alung hangin Jeroboam anadalha tai (I Kgs. 14:1-16). Hiti chun Israel lenggam chun milim houna lenggam chu ahunghitai. Hijehchun Pathen'in Assyria te atildoh'in, 722 BC in galin alah sah'in, asuhmang tai.

ISRAEL LENGAM CHONSETNA:

1. Pathen'in Egypt'a asochan naova konna ahuhdoh chu asumil taove (2 Kgs. 17:7).
2. Amahon akimveluva cheng miho pathen lim semthu chun lolhin na ding le hinkho nom apehjou diuvin angaitou vin ahou taovin ahi (2 Kgs. 17:7,12,17; Col 3:5).
3. Amahon namdangho chonna, hinkhoman ho ajop'un ahi (2Kgs. 17:8-17).
4. Amahon Pathen themgao hon chonphatna thu aseihou angai pouve (2Kgs. 17:13-16).
5. Amahon lhangphong tah'in Pathen danthupeh ho chu apom tapouve (2Kgs. 17:13-16).
6. Amahotah jongchu doi le ai lamle nulepa chonsetna lamah akipedoh taovin ahi (2 Kgs. 17:9, 15-17).

ISRAEL LENGHO:

1. Jeroboam (931-910 BC) – 1 Kgs. 12:20-134:20)
2. Nadab (910-909 BC) – 1 Kgs. 15:25-32
3. Baasha (909-886 BC) – 1 Kgs. 15:33-16:7
4. Elah (886-885 BC) – 1 Kgs. 16:8-14
5. Zimri (885 BC) – 1 Kgs. 16:15
6. Tibni (885-880 BC) – 1 Kgs. 16:16-20
7. Omri (885-874 BC) – 1 Kgs. 16:21-28
8. Ahab (874-853 BC) – 1 Kgs. 29-22:40
9. Ahaziah (853-852 BC) – 1 Kgs. 29:51-53; 2 Kgs. 1:1-18
10. Joram (Jehoram) (852-841 BC) – 2 Kgs. 2:1-8:15
11. Jehu (841-814 BC) – 2 Kgs. 9:1-10:36
12. Jehoahaz (814-798 BC) – 2 Kgs. 13:1-9
13. Jehoash/Joash (798-783) – 2 Kgs. 13:10-25
14. Jeroboam-II (793-753 BC) – 2 Kgs. 14:23-29
15. Zechariah (753 BC) – 2 Kgs. 15:8-12
16. Shallum (752 BC) – 2 Kgs. 15:13-15
17. Menahem (752-742 BC) – 2 Kgs. 15:16-22
18. Pekahiah (742-732 BC) – 2 Kgs. 15:23-26
19. Pekah (752-732 BC) – 2 Kgs. 15:27-31
20. Hoshea (732-722 BC) – 2 Kgs. 17:1-41

JUDA LENGAM

Solomon chapa Rehoboam deilou phung 10 hon Israel lenggam atumin sem jongleu phung 2 vangin Solomon chapa Rehoboam chu aleng diuvin akilhenun, hiti chun David lenggam chu

aumpeh'in ahi. Khonungin hiche lenggama hin Simeon phung le Israel lenggama kona phabepho kigom khomin Jerusalem'a Pathen ahouvun ahi (2 Chr. 3:10-11; 25-26; 35:5-7).

Juda lenggam hi Israel lenggam sangin aneovin, Ihomjong Ihomjo jongleo munpi Jerusalem aneijun, Houin aneijun, Dan (torah) aneijun ahi. Hitia David chilhah ahipeh jeh'un phung chedan aboipon, inkon dang jong leng aumpoi (2Sam.7:12-16).

Israel lenggam chu kum 200 val bep sunga leng 19 aneijouva akichai vangin Juda lenggam hin kum 334 lam lenggam aumin, Israel lenggam sangin kum 134 val leng 20 hon vai anahomun chamna ana umjon ahi.

JUDA LENGGAM CHONSETNA:

1. Thempu ho leh themgao hon jou aseitaove (Jer. 5:31; 6:13)
2. Neipap kiloset nan adimtaove (Jer. 6:13)
3. Chon thangoi le numei kijoh adimtaove (Jer. 5:8-9)
4. Thudih lou leh kinah na adimtai (Jer. 6:7)
5. Pathen thu doudal aume (Jer. 8:9-10)
6. Kitah louna adim tan ahi (Jer. 9:2-3)

Hiche chonsetnaho jeh'in Pathen'in Babylon te atildoh'in 586 vellin alataovin (2Kgs. 25:1-3; Ezk. 5:10; Lam. 2:20-21); mihem hophum lah'a hop khat chu kel leh damlouvin athiuvun, hophuma hopkhat chu chemjam in ana thiuve (Ezk. 5:12; Jer. 38:17; 39:1; 5:4; Ezk. 24:1-2).

Juda lenggam galhinga akikai mang jeng vangun David lenggam chu mutheijin akichaitan, ahin Pathen kitepna chu aumjinge (II Sam. 7:14-16). David lenggam tungdoh dinga Pakai Jesu chu hunga ahi (Lk. 1:33). Hiche guija kona chu Pathen'in namlhen chom, Namtheng, Pathen mite chu semdoh'a um ahi (I Pet. 2:9).

JUDA LENGHO:

1. Rehoboam (931-913 BC) – 1 Kgs. 12:1-14:31; 2 Chr. 10:1-12-16
2. Abijah (Abijam) (913-911 BC) – 1 Kgs. 15:1-8; 2 Chr. 13:1-22
3. Asa (911-870 BC) – 1 Kgs. 15:9-24; 2 Chr. 14:1-16:14
4. Jehoshaphat (873-848 BC) – 1 Kgs. 22:41-50; 2 Chr. 17:1-20:37
5. Jehoram (Joram) (853-841 BC) – 2 Kgs. 8:16-24; 2 Chr. 21:1-21
6. Ahaziah (841 BC) – 2 Kgs. 8:25-29; 2 Chr. 22:1-9
7. Athaliah (lengnu) (841-834 BC) – 2 Kgs. 11:1-16; 2 Chr. 22:1-23:21
8. Joash (Jehoash) (837-796 BC) – 2 Kgs. 11:17-12:21; 2 Chr. 23:16-24:27
9. Amaziah (796-767 BC) – 2 Kgs. 14:1-22; 2 Chr. 25:1-28
10. Azariah (Uzziah) (790-739 BC) – 2 Kgs. 15:1-7; 2 Chr. 26:1-23
11. Jotham (750-731 BC) – 2 Kgs. 15:32-38; 2 Chr. 27:1-9
12. Ahaz (735-715 BC) – 2 Kgs. 16:1-20; 2 Chr. 28:1-27
13. Hezekiah (715-686 BC) – 18:1-20:21; 2 Chr. 29:1-32:33
14. Manasseh (695-642 BC) – 2 Kgs. 21:1-18; 2 Chr. 33:1-20
15. Amon (642-640 BC) – 2 Kgs. 21:19-26; 2 Chr. 33:21-25
16. Josiah (640-609 BC) – 2 Kgs. 22:1-23:30; 34:1-35:27

17. Jehoahaz (609 BC) – 23:31-33; 2 Chr. 36:1-4
 18. Jehoiakim (609-597 BC) – 2 Kgs. 23:34-24:7; 2 Chr. 36:5-8
 19. Jehoiachin (597 BC) – 2 Kgs. 24:8-16; 2 Chr. 36:9-10
 20. Zedekiah (597-586 BC) – 2 Kgs. 24:18-25:21; 2 Chr. 36:11-21

THEMGAO

Themgao hon Israel lah'a pan nasa tah'a ahin lahpat naohi lenga ahung kivaipoh uva pat ahi. Lengho chu Israelte Pathen lamma pui dingle Pathen natoh nalama lamkai dinga kilheng ahin, ahinlah amaho Pathen lungdei lam boltah sanga amaho nopsah na ding jenga athaneinao amantah jeh'un Pathen'in Amin panna lengho chuleh mipiho phoh dingleh Adeisah na lampi'a ache na dinguva hilchah diuva Themgaoho hi ana manchah ahi.

Themgao ho natoh thupi pen chu anam mite aphant phat cha'a Pathen lungdei ahetsah'uva, ajuu dinguva atil khou dingu chu ahi.

THEMPU

Thempu natoh ding chu amite Pathen houna'a alamkai dingu ahi. Mipite lamdih' tah le Pathen lah theidol tah'a houlama alamkai dingu chu amopohnao ahi. Israelte lah'a Pathen houna a kibol thupi pen chu gancha'a kilhaina ahi. Ahin thempu ho bouhin pumgo thilto anabolu ahipon (Judg. 6:22-24; 13:19) hijongleh thempuho anatoh thupi penchu pumgo thilto kilhai ding danho ahiluva mipi ahetsah dingu leh dan ho ahilchet dingu; chuleh mipite chu danthu toh kitoh'a Pathen lungdeija achona dinguva ahilchah diu ahi. Ahin amaho tah'in dan ahelou jeh'un demna nasatah ana changun ahi (Hos. 4:6; Jer. 2:8; Ezk. 7:26; Mal. 1:7; 2:7,8).

Themgaoho chu Pathen'a kon thu hin po'a Pathen'a kon Palai ahiuvin; alangkhatna thempu ho chu mihem te Pathen thu hil leh mihemte Pathen to akiguijop theina dinguva palaija pang ho ahiuve.

BUNG – 4

ISRAELTE TOH KISAI LENGAM HO

1. ASSYRIA LENGAM

Assyria tehi kumsot tah Mesopotamia gamma anachengho lah'a khat ahiuve. Khopi'a anaman houchu chu Assur, Calah chule Nineveh ahi. Assyria te hi kum Jabih 8-7 lai jin athumvei na'in hattah in ahung khangtouvun, ahung hatnun, Israel le Egypt geijin ahin sukha'in ahi.

Assyria te chun aleng hou'u le leng chapa te thusim ahin, agal bolhou leh gal la sum amuhou, agal jona hou chu thusimin hoitah'in ajih doh'un, hiche lekhabuho chu tuchana aum jala Israelte thusim jong hetbe'a um ahi. Assyria ten agal jona gamhou chu agam sungu kivai homna asempha'un, achunga vai apo jiuvin, chuleh gamgiho asumang ji'un, gamkai thah danin abolun, khopi jong athah sem ji'ui. Chuleh agam lonao sunga mite chu akiphin jom jinguleh gal hingin akaijun, Assyria leng gamsunga achen sah ji'un, amaho gamsunga chun midang achensah jiuve (2 Kgs. 17:24-41).

ASSYRIA TE HOU(Religion): Assyria ten pathen tampi ana tahsanun, khopi khat cheh'in amaho pathen cheh aneijui. Ashur hi akhopi'u lenpen Asshur pathen ahin, hijeh'a hi "pathen jouse

lengpa” ti’a jana lentah anapeh’u ahi. Ishathar hi Nenevehte pathen nu (goddess) ahin. Assyria lengpa tahsan dana apathen hou - adeh’a Ashur hin amelmate jouse chungga gal jona anapeh’ahi, ati. Assyria ten amelmateo chu apathenu douna’a chon ahi atiuvin, pathen na atoh lou jeh’uva chu gotna chang dinga lom ahi atiu ahi.

ASSYRIA LENGAM HATMOLAI (800-745 BC): Assyria ten Syria lenggam thahat 802 BC’a anasuh mang jeng vangun melma ahao jeh’un Juda le Israel alo ding laitah’in alhasuh’ui. Hijeh chun Juda le Israelten lenglen Solomon khang laiija alengamu Palistine le Jordan gal lama lenggam neo ana lhaso hou chu alo thei kitnu ahi. Sahlam lenggam ma Jehoash in apa khanglaiija Syria ten ana lah peh’u gamho avel lo kitnin (2 Kgs. 13:25); Judea gamma Amaziah in Edom ala kitnin (2Kgs. 14:7), Uzziah ‘in Jerusalem asathah’in (2 Chr. 26:9), aleng thahat chun Edom gamsung alo’in, Ezion Geber’a kongkai mun jong athah’in ahong doh kitne. Uzziah in Philistine te ajouvin, Ammon mite jong kai akipeh sah’e (2Chr. 26:6-8).

Israel le Juda lenggam ni sunga cham le lungmon aumin, adeh’in Israel lenggam chun anatoh’uva hi Pathen lunglhai hinte tin agelun, hijeh’a hi neile gou le thahat na hi Pathen’in apeh’u hinte tia agellu ahi. Ahin hiche lai tah chun themgao **Amos** le **Hoshea** in Israelte chungga achonset jeh’a thutan na le jepna hung chu ding aseiphong lhone. Ajehchu Israelte chu khat le khat kah lah’a haosat le jana chang ding akichu’un, ahao le ahahon vaicha le athalhom ho chungga dih loutah’in achonun, thutan na in jenga jong nehguh ane’un, thutah ache pi pouve. Themgao kahi ti phabep in jong mite ngainom nom ding aseijun thutah apaijo taove (Amos. 3:11; Hos. 10:14).

ASSYRIA LENGHO LAH’A ATHUPIHO CHU:

1. Tiglath Pileser – III (745-727 BC)
2. Shalmanesar – V (727-722 BC)
3. Sargon – II (722-705 BC)
4. Sennacherib (705-681 BC)
5. Esarhaddoh (681-669 BC)
6. Ashurbanipal (669-631 BC)

1. **TIGLATH PILESER III (745-727 BC):** Tiglath Pileser leng hinan Assyria ten Babylon te asatnun, alengam chu hattah’in Palistine gamsung le Jordan gal lang lothei din ahin semdoh tai. Kum nga sungin aman sahlama gamtamta kai akipeh sah’in, hiche ho lah’a chun Israel jong ajao than, Juda lengpa Uzziah vang tipah jeh’a athi man jeh’in apeman pon ahin, achapa Jotham vang Assyria noiija akuntai.

Juda lengpa Jotham’in Israel lengpa Pekah le Syria lengpa Rezin toh pangkhoma Assyria’a konna chamlhat gal sat ding anoplou jeh’in Pekah leh Rezin in Juda ahinsat lhonnin (2 Kgs. 15:37), choto lhonin Edom chu Juda’a kon kitel in akiphinun (2 Kgs. 16:6), Philistine in Juda lenggam anoi lang ahinsat kitne (2 Kgs. 28:18). Chulaijin Juda lengpa Jotham athito lhonnin achap Ahaz in **Isaiah** themgao phal lou sasan Assyria lengte akithopi dingin anghin ahileh Tighlath Pileser III in akiphin lenggam teni (Israel leh Syria) chungga gal abolin Philistine jong pal akaikhumme. Israel leng gam sunga akhopi tamta asusen, Israel leng Pekah jong tha’in aumme (2 Kgs. 15:30).

Assyria lengpan Juda akithopi jallin, Ahaz jong akipa ding atah sanin, hijeh chun akipa vetsahnan Damascus’ah akouvin, chu’a chun ada acham louvin Tighlath Pileser’in Assyria pathen ahou banga Ahaz in jong ahou dingin athu peh’e. Hijeh chun Ahaz’in jong Jerusalem hou’in munna chun

maicham thupi tah Assyria pathen Ashur houna dingin, Pakai maicham khel in atungdoh'e (2 Kgs. 16:10-16)

2. **SHALMANESER V (9727-722 BC):** Tighlath Pileser III thi jouvin Israel lengpa Hoshea Assyria'a kon akitom doh got jeh'in Egypt kithopina athumin, ahin Egypt chu Israel kithopi dinga ahatmo beh set jeh'in Shalmaneser in Samaria kul aget khumin Hoshea jong songkulla akhumtai (2 Kgs. 17:1-4).

3. **SARGON II (722-705 BC):** Shalmaneser athi phatin akhella leng hipa Sargon II in Samaria abulu paijengin akhopi chu 721 BC in ala'in mihem 27,290 gal hingin akai mange (2 Kgs. 17:5,6).

Hiche hi Israel lenggam kichai na ahitai. Galhinga kikaihon chidang namdang ho akichenpi'un, Israel mi ahina jengu jong amansah taove. Sargon in gamdang mi ahin puijin Israel lah'a achen sah'in (2 Kgs. 17:24), hiche miho hin Israel Pakai hou ding dan akihil jeng vangun, amahon amin chu ajaosah'un a pathen danghou toh ahalun (2 Kgs. 17:14) ahi. Hitichun Israel aumdenho toh acheng halun, akichengun ahileh achilhah hou chu Samaria mite kitiho ahitaove.

Juda vang ana hoi doh'e. Ajeh chu Ahaz lengpa Assyria noija anaum khinkhenin ahi. Hezekiah leng ahung chanin (715 BC) Assyria a kon chamlhat ding agongin, ahin aphot dihchet angah'e. Chulaijin Egypt ahung hat doh'in Palistine gama lenggam ho chu Assyria douna kiphin din atil'in, chuto lhonin Philistine lamkai na'in Ashdoh, Edom le Moab akiphin'un, Juda Leng Hezekiah jong tep ahivangin Isaijah themgao'in aphilou jeh'in anompoi (Isai. 14:29-32). Hijeh chun Sargon in jong asat poi. Ahin Philistine vang Assyria in nasatah'in ajouvin, ahin Egypt'in akithopi deh poi.

4. **SENNACHERIB (705-681 BC):** Sargon athi phatnin lenggam tamtah Assyria dounan akiphin pantan, Hezekiah jengin jong tuhi aphot ahi tin agele. Aman alenggam sungchu houlamin asemphan, Assyria Pathen houding chu akham panin, Israel Pathen hou dan jengjong themkhat akhele (2 Kgs. 18:4,22). Hezekiah in Assyria henga kai peh ding ada'in, Egypt le Babylon toh kiguijopna (alliances) asem'e (2 Kgs. 20:12-13). Hezekiah in Assyria in ahinbulu dingu aginchat jalin Jerusalem huhbitna dingin na tamtah atonge. 701 BC in Sennacherib in akiphin lenggam ho chungga gal ahin bolin Judate jong nasatah'in asukha'e (2 Kgs. 18:13-16). Sennacherib in Juda chungga agaljo dan songhal'a ajih'in hichu tujengin jong British musium'a aum nalaije. Akisun'a chun Hezekiah kanamkol jon noija kakoijin, akhopi 40 leh khoneo tamtah kala'in, mihem 200-150 leh thil tamtah amaho'a konin gal thilin kakichome ati.

2 Kgs. 18:17-19:37 na'a Hezekiah in kiphina abol kitnin, Sennacherib in ajo kit thu akiseije (691 BC). 2 Kgs. 19:32-25 na'a kimu danin Pathen'in Juda lenggam anahuh doh'in, Jerusalem kul panga Assyria mite ana boisah'in ahi.

ASSYRIA LENGAM KICHAI (652 BC)

Manasseh Judate leng ahilai jin, Assyria in boina sang cheh cheh atoh'in, 652 BC in Babylonte akiphinun, ajonan Assyria te chu ajouvun, chulai tah chun Egypt te jong akiphinun Assyria te khutnoija konin akitom doh taove.

PAKAI LEH ASHUR

Chulaija mipi gel danna chu gamjousen Pathen len khat cheh anei ahin, gal jou lang pang chu a'Pathen'in ajosah ji danuva agel jiu ahi. Hijeh'a chu Assyria sepai jalamkai Rabshakeh in Jerusalem

te kipedoh jeng dinga agaseija chu “Koima cha agamuva Pathen’in anahuh doh joupou, Israel Pakai jengin jong ahuhdoh joulou diu ahi. Ipi dinga akinep pi dinguh ham?” ati ahi (2 Kgs. 18:19-25). Hilaija hi Assyria’in Israel lenggam jeng jong ana jo’u ahitai. Chuleh mihem lunggela chu Pathen’in amite chu ahuhdoh joulou tahtah tobang ahitai. Ahin hiche Israelte gal lel ding chu themgao hon ana seisao ahin, Israelte gallel ding leh soh chan dinguh chu Pathen’in agot sa ahi (Amos. 3:1; 5:27; Hos. 10:14, 11:5-6; Isai. 5:13).

Themgao ho tahsan chu Pathen’in Assyria chu amite gotna pe dinga amanchah maimai ahi (Isai. 7:17-20). Ahin Assyria ten Pathen’in amanchah ahi maimaiju chu ageldoh pouve (Is. 10:5-12). Hijeh chun amahon Pakai chu ataitomun, hijeh’a chu Pathen’in amaho chungah gotna ahin pehdang ahi. Hiteng chule Assyria’in gotna hinpe chu Pakai ahi ti ageldoh dinguh ahi (Isai. 10:12,24-27; 30:31; 31:8). Themgaocho chun Pakai’in ima jouse chungah vai ahome ti atahsanui.

PAKAI LE ISRAELTE

Themgao hon ipi jeh’a Pakai’in Assyria gal ajosah ham ti hoitah’in ahil chenui. Pakai’in amite chu iti chonphatah’a hin ding ham ahilin, ahin amahon adihlou ngen aboljeh’uva chu gotna chang dinga loma gotna chang ahivu (Amos. 2:4-8; 3:10; Hosh. 10:13; 11:7). Israelte chu Pathen houlam ahin, japi kitahna lama jong alhin lel tah jeh uva Pathen mihuhhing na akinep pi louhel ding dolu ahi. Themgao hon avel vela Israelte chonsetna thu aseisei jenguh ahi (Amos. 6:4-7; Hos. 10:11; Isai. 5:20-23). Themgaocho Israel leh Juda chu Assyria ten abolnao chu achan dinguva lom changuh ahi atiuve.

BUNG – 5 BABYLON LENGAM

Juda chungah kumjabi BC 7 & 6 laija thunei mama chu Babylon lenggam ahi. Babylon lenggam chu kum sang khat masanga ana kisumangsa ahijeng vangin kum 625 BC in Chaldea mi Nabopolassar kiti pan Mediate kithopi nan Nineveh ahin suse’in, achapa Nebuchadnezzar chu Chaldea lengte lah’a ahatpen ahung hitai.

Nebuchadnezzar in Egypt te chu Carchemish le Hamath’a anajouvin, 570 BC in Egypt gamma boina auma lengpa/Pharoah Apries akisuh lhah chun Pharoah Amasis in leng mun ahin chun; ahin boina akichai masangin Nebuchadnezzar in Egypt ahin bulun (Jer. 46:13-26), Amasis chu Babylon lenggam chungah hung kisaboi loudingah angeh to lhonin Babylon le Egypt lenggam kahlah’a chun chamna ana umme.

Nebuchadnezzar lengpa nungjui hochu gel sangin alo lhing mouvin, alenggam chu mi khatna konin khatna akichon lele’in ahi. Nabonidus leng ahung chanin Babylon hou lui chu akhohsah’in, alenggam chu adon phapon, lengvai sottah apoh sungin achapa Belshazzar chu ama thakhelin vai ahomsahjin ahi. Nabonidus chun amite pathen Marduk chu ahoulou jehin amite chu asulung hang jingin, Chulaija Media gamma Cyrus leng ahunghi’a Marduk pathen ngaisah tah ahung hito lhonin Babylon mite chu Cyrus lengpa khutna chun akipe jeng taove.

BABYLON TE PATHEN

Marduk (Bible’a kisei dungjuija Merodach - Isai. 46:1; Jer. 50:2; 51:44) chu Babylon khopi pathen anahin, agel dannun ama chu Nisa Pathen’a kilah ahi. Amahon amin dingin “Bel” ape’un,

hichu “Pakai” tina ahi. Thilsem chung changa Babylon te tahsan chu: Marduk hi boina thahat jouse subit/vengbit dinga natoh kipe ahin, aman Tiamat atha’a atahsa’a chu vanle leiset hi asem ahi. Hiche kipaman’a chu Marduk hi thil jouse chung vaihomna kipe ahi, ti ahi.

JUDA LENGGAM BABYLON NA AKIKAI MANGU

Jeremiah 52:28-30 in thumvei pansa’a Judate kikaimang aseije (597, 586 BC & 582 BC). Jeremiah hin amite hi avel velin ana gih’in, Pathen’in Judate hi Babylonte khatna apehdoh ding ahi anatin (Jer. 21:7; 22:25), ahin mipite chun hichi gihna chu ngaisah’in ana neipouvin, ahivangin Jeremiah in hiche athuhi Pathen’a konna ahi ti ahe giu-geo-ve.

1. Akhatveina akikai mangu (598 BC). Josiah thi (609 BC) jouvin Juda mite chun alenggamu chamlhatna thah chu huhbit jom ding gotna’in Jehoahaz, Josiah chapa chu lengin atungui (2 Kgs. 23:31). Ahin Pharoah Neco chu thahat mama ahi jallin alengthah pao chu galhingin sohchang dingin akaijin, akheldingin Eliakim atunge (2 Kgs. 23:33ff). Pharoah in Eliakim chu amin Jehoiakim (Pakaijin thuneina munna chu akoi ahi tina) asah’in ahi. Jeremiah in Jehoiakim in lengin thupi tah mantamtah lutna asah got thu aseije (Jer. 22:13-19). Juda mipite chu Jehoiakim lal lai jin Pathen dang houvin akile kit gam taovin ahi. Ajeh chu amahon Josiah’in ahousem phatna chun hinsotna le khantouna aumpoi atiu ahi. Ahin Jeremiah in mipi te chu agih’in hiche houdih lou hin Pathen lunghana leh thutanna ahin lhut tei ding ahi, hichu Pathen’in Babylon mangcha’a ahin bol ding ahi tin anaseijin ahi (Jer. 1:13; 16:10-13).

Babylonin Egypt te Carchemish le Hamath munna ahin jo (605 BC) to lhonnin Palistine gamsung le Judea gamsunga thuneina ahinla taove. Atilchun Jehoiakim in Babylon thaneina chu asangin anoi ja aumnai. Ahin chomkhat jouvin (601 BC) Egypt te ahung hat kit dannin akilah’in ahileh Jehoiakim chu Babylon dounan ahung kipantai (2 Kgs. 24:1). Phat chomkhat chu Nebuchadnezzar chu lenggam dang lo dinga akisah lungim behset jehchun Juda chu donin anei manpon, ahin 598 BC in aman asepai te Jerusalem le Judea gam bulu dingin asolin ahi. Jeremiah’in hiche hi amiten Pathen thu aman loujeh’uva Pathena konna gotna ahi ati (Jer. 35:17). Nebuchadnezzar langpan Jehoiakim chu Babylon gamma sohchang dingin leng’in sunga miphabep **Daniel** themgao jaonan, Jerusalem houin sunga manchah lutah tah phabep toh akaimang tan (2Chr. 36:5-6; Dan. 1:1-2) ahi. Jehoiakim jong Babylon gamma Dec 598 BC in anathitai.

2. Aniveina’a sohchanga kikaimang (597 BC). Jehoiakim athi nungin achapa Jehoiachin chu Judate lengthah ahunghin, ahin aman Jerusalem chung lathum le nisom bou vai ahom mannin, Babylon te khutnoi ja 16th March 597 BC in akipe doh tai. Nebuchadnezzar’in Babylon gamma galhingin, aji acha, milen milal ho leh **Ezekiel** themgao jaonan Jerusalem hou’in sunga manchah jouse toh akaitan ahi (2 Kgs. 24:8-17; 2 Chr. 36:9-10).

3. Athumveina’a sohchanga kikaimang (587 BC). Jehoiachin akikai mang nungin Babylon lengpan apaneo Zedekiah (amintah chu Mattaniah) chu lengmun lo dingin apansah’in ahi. Zedekiah hin Babylon chung changa alungel akhel jingin, chuleh chulaija chun themgao lhem phabep ahung doh’in Babylon lenggam gallel ding thu ahungseijun (Jer. 27:3; 28:1-4), chuleh Babylon gamma sohchang hochun gangtah’a Judea gama ahung kile kit dingu aging chaovin ahi. Ahin Jeremiah in sohchanga umho chu lekha agahthotin lungmong tah’a chu munna umden dingin thu agah hetsah’e (Jer. 29:3-9).

Egypt gama Apries Pharoah ahung hi’in (598 BC), Zedekiah in Egypt kisonpi nan Babylon dounan ahung kiphin tai. Jeremiah in Zedekiah umchan chu aphoh’in Pathen gotna le thutanna

achunga hunglung ding chu aseipeh'e (Jer. 24:8-10). Ahin Zedekiah'in Jeremiah thusei nahsah'a aneipeh pon ahileh Nebuchadnezzar'in asepaite Jerusalem bulu dingin January 588 BC 'in ahin soltai. Egypt in Juda chu kithopi ding agonan (Jer. 37:5), ahin akinungle pai kit taove (Jer. 37:7-9). Jeremiah in Jerusalem boina hunglung ding le akhopi kihal lhah ding chu ahen, gihna thu aseijin (Jer. 34:22), dihtah'in gotna chu ahunglung paije (2 Kgs. 25:8-10). Zedekiah jong ajam got vangin matnin aumin gotna sangtah akipei (2 Kgs. 25:4-7). Mitam tah sohchanga kaijin aumun, Jerusalem khopi, Hou'in leh kulbang geijin August 587 BC in suhsetnin aumlo'in ahi (Jer. 52:28-30).

Babylonna kikai mangho chu bolgentheijin aumpouvin, munkhat na acheng khomun, in akisah dingun phalna peh ahi. Amahon achen naova tohthei thei atongun, kimkhat chu ahaosa tahtah jong aummui.

JUDATE CHEHCHAO (582 BC).

Jerusalem kilo le kisuhset jouvin Babylon'in Juda chungga Gadaliah chu gamvaipo'in alhendoh'in, aumden sese chungga thuneina ape'e. Gadaliah in Mizpah'a pan in vai ahomin (2 Kgs. 25:22) ahi. David chilhah 'a kon Ishmael kitipan tha ding asomin, Amon mite kithopi na achang'in (Jer. 40:41) Gadaliah chu athat tai. Gadaliah athijouvin Judate tamtah chu Babylon kichat nan Egypt'a ajam taovin ahi (2Kgs. 25:25f).

BUNG – 6 PERSIA LENGAM

PERSIA TE LEISET CHUNGA ATHUNEIJU

Babylonten Assyria lenggam chungga vai ahom laijun, Medes (Media) ten noilanga vai ahomui. Kum 70 sung tobang lenggam teni chun lhangphonga kidouna neilouvin amun hon cheh'a vai ahomkhom hone. Ahin 550 BC in kikhelna lentah ahung soh dohtai. Persia te chungga Cyrus leng chanlaijin, Median leng Astyges sepai te leh Elame mite dounan gal ahin bol tan, kidouna chu Media te dingin ahahsa lseh'in, Cyrus joh'in gal chu ahin jouvin lenggam ahin lahbe be to lhonnin Media pumpi chungga leng ahung hitai. Kum 539 BC in Cyrus in Babylon ahin bulu paijin, 539 BC in Opis mun Tigris lui koma asepai jalamkai pau mat ahito lhonin, Babylon jong ni chomkhat jouvin kilethuh louvin akipe doh tai. Persia te chun kum 200 sung tobang lengvai apo'un, Cyrus nunga vai hom hochu Cyrus banga pha aumpouvin, amaho lah'a aphapen chu Darius I ahin, 522-486 BC sung lengvai pon apange. Persiate dinga amelma lenpen chu Egypt ahijinge.

JUDA KISAHPHAT

Jeremiah in anahil ma bangin Judate dinga kinepna chu Babylon'a kikaimang ho khutna um ahi (Jer. 24:4-7). Thumvei pansa akikai mang nungun jong mi themcha dalhah'in aum nalaijun, ahin hiche ho chu imacha hilou ho ahitaove. Ajeh chu aching athem jouse Babylon langa kaimang ahitaovin ahi. Babylon gama aumuva Pathen houding dan akihil jing jeng vangun Judate chu Jerusalem kisuh set leh adeh'a Houin/Temple kisuh chim jehchun alung lha mama jeng nalaijun ahi (Isai. 63:18ff; 64:10f). Amahon Pathen'in aching jingun, angailu jingui ti atah san theipouvin (Isai. 40:27), amite dinga Pathen'in na atoh theiding chu aging cha pouvin ahi. Babylon lenggam adetdan le agaljo dannu chu Marduk chu Pathen sanga thaneijo danin aumin ahi (Isai. 42:17).

1. **KINEPNA AHUNG KILE KIT:** Babylon'a asoh chanlai jengun jong themgao ho chu aninghling leheh jengui. Amahon amite lungsunga Pathen'in Babylonte khutna apeh'uva gotna achanuhi Pathen suhmil na'a aneilou teitei nadingun pan ala jingui. Amahon ahunglung dinga mihemten Pathen thaneina atahsan theina dingun thu aseijun, ajih jingun, amiten Pathen vangbohna achanu chu aheth dohna dingun ahiljingui. Amaho lah'a khat chu **Ezekiel** themgao, (aniveina kikai manga Babylona sohchanga) ahin, aman Jerusalem'a aumlaijuva themgao hon ana seiju leh anahil nao ho chu mipite athah geldoh sah'in, tu'a Babylon na sohchanga aumu jonghi Pathen natoh ahi atin; Pathen thudihna chu atahsanin (Ezk. 18:4) alunghei ja Pathen henglam jonkit techu Pathen'in vang aboh ding hi akinepna ahi (Ezk. 33:19; 36:24-28).

2. **JERUSALEM AHUNG KILE KITNU:** Kum 538 BC'a Cyrus leng ahung chan nungin aman Judate chu agamuva a houin'u aga kisah phatkit theina dingun phalna apen ahi. Aman Babylon ten houin munna pat ahin pohdoh'u manchah theng hochu akile poh kit dingun thu apen, Houin kisah nadinga sum lut dingho chu leng'insung (leng sum) a kona peh dingin phatsahna aneije (Ezra. 6:3-5). Cyrus in Juda mite agama kilekit nomho dingin jong phalna ape'in, achehon na phatah'a atohna dinguva thu apeh to lhonin, aumden hon ache tah louvu jongleh in sahna ding sum acheho apohsah dinguin atilkhove (Ezr. 1:2-4).

Judea gama kona thumvei pansa'a Babylon gama kaimanga aum bangun, Babylon gama pat Judea gama akilekit nujong thumvei pansan akile kitnun ahi. Khatvei na'a – 538 BC kumin Zerubbabel lamkaina'a (Ezra.1-6); Nivei na'a – 458 BC kumin Ezra lamkaina (Ezra.7-10); Thumvei na'a – 445 BC kumin Nehemiah lamkaina'a (Neh.1-13) akinung le'un ahi. Athusim masa ho 2 Kings, Esther, Jeremiah, Daniel, Habakkuk ho ivetleh Babylon a asonchanu akimui. Hiche Judate kile doh kit sunga themgao ho chu: Haggai, Zechariah le Malachi ahiuve.

3. **JERUSALEM HOUIN KISAHPHAT:** Kum 520 BC in themgao ni **Haggai** leh Zechariah chu Jerusalem'a ahung lhonin mipite chun Jerusalem houin asahphat dinguin ahung tem lhone (Ezra. 5:1ff). Amanin ahil lhon leh atahsan lhon chu mipiten Jerusalem'a gentheina ato chengu chu amaho angsung ding sehseh akivet jeh'u ahin, amahon amaho kisumila Pathen jengbou ageluleh houin asahthei dingui, thiljouse kikhel ding ahi atilhone (Hag. 1:8f; Zech. 1:16f). Amanin Pathen'in namtin jouse lung asuhliah ding ahi ti ahil lhone (Hag. 2:6; Zech. 2:9). Juda miten hiche tilkhouna chu asangun houin chu kum li sungin asadoh un (516 BC), ahin hichehi hahsa tah'a ajo'u ahi. Solomon houin bangin ahoi joupoi. Ahin Judaten Pathen houna ding mun chu aneikit taove.

4. **JUDEA GAMKAI JA JUDA TE HINKHO:** Judea gam le Jerusalem'a hinkho ahahsa leheh jenge. Akhopi tamjo chu achimsa ahi nalaijin, Juda ho lhomcha bou chu Jerusalem'a achen nomui (Neh. 7:4). Hijehchun amaho khopi dang dang Bethlehem, Geba, Bethel leh Jericho ho'a achengui (Ezra. 2:20-35). Hilaija chun amijat mongmong chu 50000 bep ahiuve. Kivaihopna lam jenga jong Persia te noija aum nalaijun, Houilampanga kivai hopna ding chu thempu khutna akoijui. Chulaija thempu chungnung chu Joshua, Joiakim leh Eliashib ahiuve (Ezra. 3:2; Neh. 13:28; 12:10).

5. **JUDATE CHAMLHAT:** 445 BC kumin Susa munna Persia court na konin thupole khat ahungin Juda ten kiloikhom le houin ding sahna chungu boina sangtah atoh'ui tithu ahung lhungin ahileh, leng insunga natong Nehemiah chu alungsung atong kha leheh jengin, amite'a dinga thilkhat beh bol atup leheh jenge (Neh. 1:1-4). Nehemiah (leng juhail dompa) chun anghena dungjujin Artaxerxes I in Nehemiah chu ache'a akhopi'u sahphat na dingin phalna apetai. Judea gamsunga

jenga jong gamvaipi (governor) dingmun chan gei panmun apen 445 BC kumin asoltai (Dan. 9:24-27). Nehemiah vaihopna noileh lamkaina noiija Jerusalem khopi kulbang chu jotheng ahi.

PAKAI DANTHU

Hichelai chun Babylon'a kon lamkai len Ezra Jerusalem'a ahungin (458 BC), aman Babylon'a pat danthu bu Juda mite kihilna le kipui jangna dingin ahin poi. Ezra hi leiset tahsa kivaihomna lama lamkai hilouvin, houlamkai joh ahi. Amahi Artaxerxes'in ahin sol ahi (Ezra. 7:25f). Lengpan Ezra chu akhutna um DAN chu mipi ahil dingin thu ahin pen (Ezra. 7:14), Judea gamsunga chenglou thumang lou Juda mite chu gotna apeh dingin jong thu apei (Ezra. 7:25). Hiti chun phatsottah Pathen danthu anasuh mil tahsao leh anajui tahlouvu chu Ezra thempu pan ahil chenin, Pakai danthu'a athah'in kibalphuna anei kit taove (Ezra. 7-10).

Judate chu phatseh a milim hou jeh'a gihsala aum jingu ahin, hinla kidang tah'in Babylon'a sohchanga aumuva ahung kile kitnuva patnin milim hou hi ahin pailha taovin ahi. Pathen ahounao Jerusalem houin le khopi suhset ahito lhonin Juda ten asohchan nao Babylon muna Pathen houkhomna ding mun thahbeh khat ahin pandoh'un hichu tuni changeija Synogogue ti'a kihe khu ahitai. Jerusalem Houin sahphat ahikit jeng vangin Synogogue hi akho kho'a eiho houin neibanga aneijun, Pathen houkhomna le Pathen thu'a kihilna mun chu ahung hioph tan ahi.

BUNG - 7 INTERTESTAMENT PERIOD

OT thusim kichai (Neh. 13:4-30) leh gaothusei nukhah pen (Malachi 1:1-4:6) apat NT kipat (Lk. 1:5-25) kikah kum 400 (ca. 424-6 BC) tobang sung hi Silent year/Kumthup akiti. Ajeh chu gaothusei koima cha aumpon, hinlah Daniel gaothu seiho agui lhunge.

Daniel'in amu leh ase masat ma bangin Israel gam chungu thaneina chu Babylon te'a kon Medo-Persia, Medo-Persia te'a kon Greek, Greek te'a kon Rome achange (Dan. 2:39,40; 7:5-7). Kum 200 sung tobang Persiate chun Judate chungu vai ahommui (539-332 BC). Persia te chun Judate agamuva kile kit dingvin thupheh aneijun, akulpi'u asah phat'uva Jerusalem'a Pathen ahou kit diuvin phalna apeuve (2 Chr. 36:22,23; Ezra. 1:1-4 – 538-445 BC). OT kichaijou kum 100 sung tobang chu Judate Persia te noiija Syria gamvaipo noiija aumun, Thempu chungnungin japi vaihomna lama thuneina jong aneije.

Hichephat sunga Israelte lah'a kiloikhomna phabep hung pengdoho chu

1. **PHARISEE:** Hiche thucheng hi 'parash' a kon kiladoh hichu "kichomkhen/chomkhen (to separate)" tina ahi. Amaho hi houlam thudol'a kiloi khom "holy one" ti'a hung kipan, Maccabeas toh hung kitho uva Palistine gamsunga Greek chondan (hellisnistic) suhmang som ahivu. Ahin Maccabies hochu power ahin mumu'un Hallinism (greek chondan) toh ahung kijopmat phatnun hiche group hohi hung kichom khen doh'uva atum beh'a midang sanga lamdang jep le tomngai tah'a Pathen'a dinga hung kichom khen ahivu. Amaho hin danthu ho khaotah'in asemun, ajui bukim somun, vantil ho le mithi thokitna atahsanun ahi. Amaho hi lhomcha ahivangun Palistine gam'a mitam jo seiphath ahivu. Josephus seidinnin Jesu khang laiija chun mi 6000 val ana'umun ahi.

Amahon Houin (synogue) ho chungu thu ana neijun Jerusalem houin'a jong thaneina aneijun ahi. Pathen khatche tahsan (monotheistic) ahiuvin, Old Testament apumpin athaneina apomuvin; vantil ho le thilha ho a'um atahsanun; thi nunga hinkho leh thokitna jong atahsanun ahi. Amahon Pathen'in mihem hinkho hi akhohsah'e ti atahsanun, ahin mihem hohin atoh dungjui cheh'uva achunguva thil lung ji ahi ti jong atahsanui.

2. **SADDUCEE:** Sadducee hohi Pharisaiho banga atamlou vangun chuchelai phatna dinga mi haosapenho, mi inchenpenho, thempu chungnung ho ahiuve. Amaho hi David le Solomon khanglajia thempu chungnung Zadok (2 Sam 8:17) chilhah, thempu gui hi'in akiseijun ahi.

Sadduceehon Pentateuch bouhi Pathen thu dihtah'in apomun Pharisai ho tahsan le jui kamchenga hung kipeson dan (oral law), akhang khanga chonna dan (tradition) le danthu hilchetbu (misnah) hochu adouvun ahi. Amahohin thi nunga hinkho atahsan pouvin, tahsa thokitna atahsan pouvin, thi nunga kipaman (reward) le gotna atahsan pouvin, vantil le thilha jong atahsan pouve. Amahon Pathen hin mihem hinkho mandanhi akhohsah poi atiuvin, mijouse hin adeidei abol thei ahi ti atahsanu ahi.

Amahohi polam muthei thil ho'a alunglutnun (materialistic), kivaiahomna (politics) lama akikumun, Rome Govt. to kitho'in tohmun lentahtah aneijun ahi. Amahon Greek chondan ajuijun, ahaosa theijun, Jerusalem hou'in vekol le asunga natong thempuho ahiuve.

3. **DANTHU SUNHO:** Amaho hi atamjo Pharisee ahiuve. Babylon muna Ezra phatlai chun Pathen thu hatah'in ahin khohsah'un, ana sim (study) un; hiti'a kona chu danthu sunho hi hung kispdoh ahiuve. OT le NT kikah sunga pat hiche danthu sunho hi danthu hilchet chung changa thaneina jouse kipeuva ahi. Amaho hi atamjo Pharisee ahiuve. Hiche danthu kisun mipiho henga hilsonho chu "Rabbi/houhil" kituu ahi.

4. **ZEALOT HO:** New Testament sunga munlhomcha'a bou akimuvin ahi. Jesu seijui Simon chu Zealot anahi (Lk 6:15; Jn 18:40). Josephus chun Jesu to kilhet Barrabbas jongchu Zealot ahi ati. Josephus'in Zealot hohi Galillee mi Judas in ahin phudoh, AD 6 kuma Kai kitamdon theina dinga Rome Govt in minkhum ding ahingonu douna dinga kiphutdoh ahi ati. Amaho hi Pharisee ho to kithojing ahiuvin, Pathen bouvin Judah te chungu vaipohna ding thaneina anei ahi ti atahsanu ahi. Amaho hi gamle nam dinga hinkho phalngam leuva pang ahiuvin, amaho dinga nampi natoh le hou natoh hi kikhen theilou ahi.

5. **ESSENE HO:** Amaho hi NT sunga akiminphah lou vanguva Josephus (Juda thusim jih) le Philo (Egypt gama um Judah miching/philosopher) lekha jihna'a kon het ahi. Amaho ahung kiha hetdoh dehnao hi 1947 kuma Bible manuscript (kijih doh) "Dead sea scroll" ahung kimudoh'a kon ahi. Hiche lekhabu kimudoh chuleh Essene hohin kimatna hatah'a anei diuva tahsan ahi. Amaho hi Pharisee le Saducee hotoh thakhatna hung'umdoh hidinga tahsan ahi. Amahohi atuma munthipma khosa (ascetic group) ahiuvin, Death sea pang Qumran mun vela hi tamtah uma anahiuve. Amahohi jineilou dingin akitepmun, chapang pasal ho ana kiva tho jiuvin, ahin kahlah'a ajinei jong aumthou'uve. Mikhat chun hiche Essene holah'a ajaoding leh anei agou jouse apehluh ding chuleh kumthum sung patepna phat (probationary period) hinalai ding ahi.

BUNG – 8 **GREEK LENGAM**

GREEK TEN LEISET CHUNG ALO'U

Greek te thusim hi masang laipeh Exodus khanglaija hung kipan hita jongleh Bible'ah Judate sohchan na'a kon ahung kile'uva akiseipan bep'in ahi. Ajeh chu masanga chu amahohin kivaipohna hattah ananei louvu, leiset pumpi ana hopkhah (influence) lou'u, Israelte to kisas kaina aneilou jeh'u ahi.

338 BC in leng Phillip II Mecedonia lengpan Greek mite khopiho alan, agamsung chu ama dan noiya ahin koije. Kum 2 jouva ama athi jeng vangin achapa Alexander the Great in apa panmun chu alan, Greek chungga 336-323 BC sung lengvai apo'e. Alexander'in Persia to kiboina asujom paijin 334-331 BC kikah'in Persia lengpa Darius III chu 3 vei kisasna (3 decisive battle) ah ajouvin, Persia lenggam chu Greek thaneina noiya 332 BC in aumtai (Dan.8:5-7),20,21; 11:3).

Hitichun Alexander'in achena channa gal ajouvin, Persiate thaneina abonin asumangin, Egypt, Babylon, Susa, Persepolis ho alasoh keijin, 326 in India gamma Indus vadung ahung lhungin, Solama dinga agamgi ahitai. Thusim kiseidanin Alexander chun gamlo ding aumbe tahlou jeh'in akap'e akiti. Aman kum som lut louvin Persia vaihomna chu asumangin Greek vaihomna Greek lenggam atungdoh'e. 323 BC in Kum 32 bep ahilaijin Babylon'a khosih natna jeh'in ana thitai.

Alexander thi jouvin Greek lenggam chu anoiya vaihom sepai lamkaiho kah lah'a kiboina aumin, alenggam chu khentel ahitai (Dan. 8:22; 11:4). Hitichun lenggam chu 301 BC in lenggam 5 ana'umdoh'in, hicheho chu: *i.Mecedonia, ii.Thrace, iii.Asia Minor leh Phoenicia, iv.Egypt le Palistine chuleh v.Babylon* ahi. Ptolemy I Sater (Egypt gama Ptolemies lenggam phutdohpa) chun Israel chungga thaneina ahin latai. Ahin 301 BC in kinop tona dungjujin Israel gamchu Seleucus I Necator (Syria'a Seleucid lenggam phutdohpa) achang kittai. Hiche jeh hin Seleucid le Ptolemaic dynasty kah'a kitomona aumjinge (Dan. 11:5). Judea gam vang Ptolemy in 301 BC apat 198 BC geijin anoiya ana koije (Dan. 11:6-12). Ptolemy noiya Juda ten houcham lhatna aneijun ahi.

JUDATE LEH GREEK HOU LEH CHONDAN

Greek ten pathen tamtah atahsannun, hiche pathen ho chu Olympia mol lah acheng khomun, amaho chu pathen lengpa (chief) Zeus noiya um danin atahsanui. Ahin Greek miching lunggel thuhnei (philosopher) tamtah'in Greek pathenho chu apaijun, amahon mihem hinkho'a thilkhat boldoh'a aum (achievement) dingpa joh hi agelkhoh jo'un ahi. Chuphat laichun amaho Arts, Science le Philosophy lama sangtah anahiuve. Greek **Arts**: drama, songkhen (sculpture), milimjih (painting) ahin; **Science**: Geometry, engineering, geography leh vanthamjol thu (astronomy) ahin; Philosophy: human nature (mihem hina), human society (japi hinkho) – hohin tuni changeijin mun lentah alo nalaije. Alexander jonghi Greek philosopher Aristotle noiya hung seilen ahin, hijeh'a hi ama gel dana mihemte dinga atohthei chu Greek chondan hi midang ahetsah'a ajuisah ding hi alungtup pen anahi.

Hitichun Alexander'in Judea gam'a Judate chu adan'u akijui dunguvin phalna ape'in, chuleh a Sabbath kum tengu jongle kai (tax) angaidam ji'e. Ahin Alexander'in Greek chondan (Hellenism) chu agam lona jouse'a lutsah asom teijin, leiset chungghi Greek pao leh chondan/lunggel mangcha'a kipumkhat sah ding agot ahi. Ama nunga anung juhon Greek chondan mijouse ahin juisah'uhi Israelte houva dingin tijat umtah ahungsoh'e. Ajehchu houdang (cult) ho bangin Greekte hindan hi avet hoijin, manchah leh jui dinga phatah leh jui thanopnop umtah ahi. Ahin Pathen lam thu leh Pathen hou suboi thei aumjin; hijeh chun Greek chondan chung changa hi ipi abol dinguham? Asan dinguham? Apai dinguham? Greek chondan chu kipom leh Juda mi dihtah hi hahsa loudingham? tiho hi Judate dinga thudoh lentah ahung hitan ahi.

PTOLEMY NOIJA JUDATE

Greek lenggam ake toh lhonin Judea gam jonghi Egypt lenggam sunga thunei Ptolemy noijs aum tha'in, Ptolemy hi Greek chondan ngaisangtah ahi. Ptolemy hin Greek lenggam adet sung sese'in Egypt chungga lengvai apon, ahin 198 BC in Seleucids hin Palistine gamsung chu alahpeh tai. Ptolemy insungin kum 125 Palistine chungga lengvai ahom lai hin gamsung chun chamna aumin, hinla kikhelna lentah vang aumpoi. Hiche laijs Judate khantouna tah chu Greekte khopi thah Alexandria (Egypt)'a achennu chu ahi. Chumuna chengho chun Greek chondan angaisangun, chomlouvins apao'u (Hebrew) kisan asumil gamtaove. Hijeh'a chu Hebrew va kisun Danthu bu (Bible) chu hetthem hahsa asa lseh taovin, hijeh'a chu amahon Hebrew OT chu Greek paova ahin ledoh'un, hiche bible chu tu'a LXX/Septuagint ti'a kiseihi ahi.

SELEUCID NOIJA JUDA TE

Alexander thi nungin lenggam chu asepai lamkai ho akihom taovin, 281 BC in Seleucus in Ptolemy tilou adang sese chu ajousoh keijin ahi. Ahin 198 BC in Antiochus III Seleucus insung mi khat'in Egypt ajouvin Palistine chungga thuneina ahang tai. Atilchun Judate chu akipah lseh jenguvins ahi. Ajeh chu kai jengjong kum 3 sung adonlou ahin, hijehchu hinkho chu nop asalseh jengui. Ahin Antiochus III chu Rome ten ahin jouvun ahileh Judate chungga kai tamtah tah ahin ngeh pan taove.

Greek vaihom ani chana chu Seleucus IV (187-175 BC) ahin, amachun Judate akitohpi jingin (2 Mac. 3:3), ahin houin'a sum kikoiho chu manchah dingin tamtahtah akilah ji'e. Judate dinga vangset umpen sung chu Antiochus IV (175-163 BC) vaihom lai hi ahi (Dan. 8:9-11,23-25; 11:21-35). Aman amin dingin Epiphanes (tahsa'a pathen hungkilah) akisah'in ahi. Hichelai chun Jason kiti pan Antiochus chu sum tamtah peh'a thempu chungnung'a ahin pansah dinga angehto lhonin ahung pangtai. Hijeh chun Jason in Greekte pathen houna toh kisaija golseh'a jaona thei tamtah ahin polutnin, thempu ho jengjong chu pathen dihloou houna dingin phalna ahin pei (2 Mac. 4:8-10; 1 Mac. 1:14-15; 2 Mac. 4:14-15).

Antiochus IV in Jerusalem chu ahin bulu'in (2 Mac. 5:23-25) akhopi chu achomin, akimkhat asumangin, akhopi sunga chun namdang sepai umna ding Inn lentah khat asai (1 Mac. 14:36). Aman Judate chondan leh Pathen houdan akhamin (1 Mac. 1:45), Danthu bu jouse govam dingin thupheh aneije (1 Mac. 1:156-57). Cheptan ding jong ajahda'in (1 Mac. 1:50), muntina pathen dang houna dingin maicham atungdoh'in (1 Mac. 1:54), achung chonnin Judate vohsa anehsah'in (2 Mac. 6:18-19), Jerusalem hou'in maicham munna Zeus pathen maicham athungdoh'e (2 Mac. 6:2). Hitichun Antiochus in Judate hindan jouse khel asomin, Greek te chondan chu abona juisah tei asome.

JUDATE CHAMLHAT GALSAT LEH CHAMLHAT

Hitichun mitamtah athu anun jeng vangun tampi chu Pathen danthu peh juibukim dingin aum jing nalaijui. Amaho lah'a group khat chu Hasadin (tichu atheng ho, ahilouleh akitah ho tina) ho ahiuvin, Greek chondan chu juilou tei asomui (1 Mac. 2). Chulai chun Mobin munna leng sepai jalamkai jin thempulen Mattathias chu Greek pathen maicham sem dingin ahin puitouvin, ahin Mattathias chu Greek pathen maicham bolnom louvin Juda thempuho maicham semho chutoh sepai jalamkai chu atah jotaovin, thinghang lam'a achate toh Juda mikisah phabep to ajam taove.

Mattathias thi jouvin achapa Judas chun ahin lamkaijin, aman amin dingin Maccabbaeus akisah'in; amatoh chamlhat galsatho chu Maccabees ahung kiti doh tai. Amahon (Judas le achapa 5

ho leh anung juidangho) kum 24 (166-142 BC) sung chamlhat gal asatnun ahi. Hitichun Rome lenggam ahung khantouva Seleucid vaipohna ahin hano jah'un Jerusalem'a patna Greek sepai kichondoh louthei ahitapon, akichon doh doh'u to lhonin Judas Jerusalem alutnin, Houin asuthengin (1 Mac. 4:36-61), Jerusalem houin chu 164 BC in athah'in thenso ahi. Hiche hou'in thenso to lhon chun **Kut** thah khat akisemdoh'in hichu "Hou'in thenso na kut (*Hanukka* ahilouleh vah kut – festival of light ti'a jong kihe) khu ahi (Jn. 10:22). Antiochus IV thi jouvin Greek lamkai tamtah lamkai ding akichu jing laijun; hichu Judas in pansat nan aneijin, Palistine gam le Jordan gallang sanga athaneina avetsah tai. Greek thaneina'in Judate thaneina ahin pomtei dingin alha tan, hiti chun Judate chu ahou'u, adan thu'u chamlhat tah'a ajuithei na dingun phalna ahin mukit taovin; achunguva dan akoi jouseu chu ahin ladohkit taove.

Mattathias chilhah hochun Hasmonean Dynasty (ahungkon dohna pao Hashmon'a kon alahsonu) ahin phutdoh taovin ahi. Hasmonean hochun thempu chungnung panmun chu Zadok chilhah ahilou vangun alo'ui (Num. 25:10-13; Ezk. 40:46; 48:11). Ahin chomkah louvin Hasmonean hochun Hellesnistic (Greek chondan) ahin juikit taovin, Greekte mijopdan (influence) chu Palistine gama Hasmonean ho lengvai hom sung (142 BC – 63 BC) chun aumjinge. Hitichun Hasmonean Dynasty chu 63 BC a Pompey Roman General'in Aristobolus II le Hyrcanus II kikh'a ahung kijelut chun abeitan, Palistine chu Roman te noiya aum kittai.

BUNG – 9

ROME LENGAM

Greek ten Medeteranean solam'a vai anahop laijun lhanglam'a lenggam thah khat ahung kisp doh'in ahi. Italy'a chu chamlhat lenggam tamtah ana uma ahin sottah boina aum nungin hiche lenggam hochu lenggam thah khat ahung kiso doh'in, Rome chu akhopi'u lenpen ahung hitai. Italy gam chu senate (thalhenga vaihom) hon vai anahomun, senate member ho chu gamsunga mihaosa le mi thanei ho ahiuve. Chomkhat jouvin thalheng ho lah'a alamkaipa chu Ceasar tin ahung kihetai. Hiche hi Julius Caesar (100-44 BC) nung'a pat hung kipan ahi.

Hitia chu Italy gamho jouse chun chamlhatna aneicheh'u, amahon agamcheh'uva dan, thutanna Inn le dan, chuleh mipi chungka kai akidon theiju ahi. Ahin amaho jouse chungka alenpen Caesar aum leh senate aum chu ahecheh'ui. Rome lenggam chu gamkai tamtah'in akihomin, gamkai khat loilo chu Caesar in atun/alhen ho'in vai apo'un amaho chu Legates ahilouleh Procurators tin akihen, khatloi chu Senate in alhen gamvaipo (governor) ho'in apon ahi. Rome ten alet alal nau chu agamkai jouse'a sepai tamtah tah akoijuva hin avetsah'ui.

Seleucids le Rome lenggam kah lah'a boina masa pen chu Antiochus III in Greek lenggam Greece chungka lalna ahin chu'a kipan ahi. Antiochus chu Rome ten ajouvun Europe'a pat nodoh'in aumtai. 64 BC kumin Rome sepai lamkai (General) Pompey jin Palistine le Syria chungka gal ahin bolin chomlouvin Greek thaneina chu ahin subei tai.

ROME LENGAM NOIJA ISRAELTE

Greek ten Palistine chungka athuneinao ahung lhah cheh cheh Macabees ten vai ahin hop thei phatnun, Palistine gamsung le Jordan gallang chu John Hyrcanus (164-104 BC) Judas Maccabaeus tupa chun leng hina min (title) chu ahin kilah in agamsung chungka chun 134-104 BC sung vai ahin

hommin ahi. Juda'in anoija um nomlouho chu ahin jouvin aman ajo ho chu thilni akilhen sah'in, hichu: Judami hiu ham, ahilouleh agamsung adalhah diu ham ahi. John Hycanus athi jouvin achateni leng ahung kilha hontan, amasan Aristobulus I 'in 104-103 BC sung; abannin Alexander Jannaeus'in 103-76 BC sung vai ahome. Alexander Jannaeus in alenggam chu Amon, Moab le Egypt lhanglam geijin akeh be'e.

Judatin Rome tehi achunguva kikum ding atep tho uva akou tho'u ahi. Alexander Jannaeus athi jouvin ajinu thaneitah Salome chu Judate chungu 76-67 BC sung vaihomin ahung kitunge. Aman achapa alenjo pa Hyrcanus II chu avaihom sungin thempu chungnungin apansah'in, amanun Pharisee te chu akilung lhaipi mama jengin ahi. Achuti laichun achapa aneopa Aristobolus II chun vaihop le thunei ding chu nan Saducees ho aloi jin akiseme. Hiti chun Salome thi jouvin Juda kiloikhom na 2 panpi na jallin achapa teni kakah lah'a chun lhangphong tah'in kidouna ahung umtai. Hyrcanus I chu Jericho koma kidouna'a chun gallel in aumtan, Aristobulus II chu Judea gamma lengin aumtai (66-63 BC). Ahin Hyrcanus II in Idumean gamvaipopa chu aloijin akisem kitnin, Nabatea lengpan jong akithopi'in hiti chun Jerusalem chu abulu'un, ahin Aristobulus jong Roman General Scarus panpi na jalin gallel'in aumdehpoi. Hiche hi Pompey (Gnaeus Pompeius Magnus 106-48 BC) in Palistine leh Syria gama vaihopna ahin neigot lai ahi.

Hyrcanus II (76-66 BC) leh Aristobulus II (66-63 BC leng) in leiset chungu thaneipen Rome ahi ahin hetdoh cheh cheh honto lhonin, Rome kithopi na chu ani lhonin chan ago lhontai. Ani lhona Pompey chu nehguh peh'a lengmun channa dinga kithopi sah ding atilhon lai jin Pompey in anilhonin Damascus'ah achung thu lhon seipeh dingin akou lhone. Chule Pompey'in Hyrcanus II chu lengmun chang ding dihtah ahito lhonin apanpi tai. Ahin Jerusalem miten Aristobulus II chu apanpi thou thouvun ahileh Pompey in Jerusalem ahinbulu'in Houin sung geija asat'in ahi. Ajeh chu Aristobulus II panpi ho chu achaina kheh'a kiselna ding mun aneilou phatnuva houin sunga chu kiselu ahi. Juda mi 12,000 hiche kidouna'a chun tha'in aumin, Aristobulus II jong Rome'a sohchangin puijin aumtai. Hitichun Palistine, Samaria leh Jordan gallang se chu Rome gamkai jin aumtan, Hyrcanus II chu Jerusalem'a thempu chungnung le Ethnarch (leng hilou, ahi'a amadan le chondan dungjuija vai homma pang, ahijeng vanga Rome thaneina pompeh) in pansah ahitai (63-40 BC thempu chungnung; 47-40 Ethnarch).

Chuche nikho'a patchun Juda vaipoho chu Rome thuneina noi ja thaneina aneijun, ahin chomkah louvin Hyrcanus II chu vaihomna lampanga athaneina chu lahpeh'in aumin thempu chungnung ahina bou chu tuhsah'in aumtan, apan mun na chun Antipater le ainsung mite chu Judea gamma kivaihopna lama alenpen ahung hitaove.

ANTIPATER (43 BC'a thi): Pompey thijouvin Antipater chu Judea gama vaipo'in ahung pang pan'in ahi. Julius Caesar Rome gamsunga ahung thunei chun Antipater hin athuneina abitna dingin akithopi'in (47 BC) ahileh Julius Caesar in kipamana ama chu Rome mi hina apeh'a Judea gamsunga gamvaipo'a apan sah ahi. Antipater vaipoh lai jin Judate chu amaho chama thu kitan theina aneijun, sepai natoh leh sepai panna'a konin jong ahoidoh'ui. Ahin Juda hon Antipater adeilou nao aumtei tei jin ahi. Ajeh chu ama Juda mi ahipon Idume mi Edom (Esau) chilllah ahi.

HEROD LENG LEN (Herod the Great): Antipater in achapa teni chu avaihop akithopi sah'in, alenjo pa Phasaël (40 BC a thi) chu Judea gam le Perea gamsunga apansah'in, aneojopa Herod (73-4 BC) chu Galilee gama apansah'e (avaipoh sung 37-4 BC). Herod hin gucha khat achung

thu hoitah'a khol louva themo achan jeh'in thempu chungnung ho leh Juda thutanho to boina aneijin, ahin Rome ten ahin panpi jeh'un hichu pansatna aneijin Romete to kiguujopna aneilon ahi.

Julius Caesar (100-44 BC) athi jouvin Juda miten Antipater suhmang asomun, ahin Mark Antohny (Roman general 83-30BC) in Palistine chungna vaihomin ahung pangin, boina ahinla paijin Phasael le Herod chu ani honnin gamvaipo khat (join tetrarch – tetrarch hi Ethnarch sanga neojo ahi) in asemin, Hyrcanus II chu thempu chungnung in asudetne (63-40 BC).

40 BC in Persia mi Parthians in Palistine ahin bulu'in Hyrcanus II chu Babylon na sohchangin akai mangun, Phasael chu amaleh ama akithatnin, Herod in Rome kithopina aholin, chulaijin Parthian miho'in Antigonus, Aristobulus II chapa lengin atungin ahileh mipi te chu akipah mama jengun, aman kum 3 (40-37BC) sungin Jerusalem'a lengvai ahome.

Mark Anthony (Roman general 83-30BC) le Octavian (Augustus ti'a kihe Rome leng/emperor masapen 27-14 BC) in Herod chu Judea gamma lengin ahin lheng honnin, alenggam alo theina dingin gal la ahin kithopi lhone. Octavian in Herod lenglen chu anam detnin gamdang jong apehtha'e. Herod hi insa minthang tah ahunghi'in, Jerusalem houin goh hilouvin aman aleng in dingle kichep na ding in jong asa'e. Chuto lhonin aman Caesar houina ding houin khat jong asa'in ahileh Juda mite alung lhaimosah lleh jenge. Aman alengam leh apan mun adetna dingin Juda mi Hyrcanus leh Aristobulus chanu chu akichenpin, ahin hichu sotjou louvin alengmun chu dinga aginmo jeh'in kum get jouvin athat tai. Aman achate mi 2 jong lengmun hinchu dinga aginmo jeh'in athat'e.

LENGGAM KIKHEN

Herod in athi masangin achate pan mun ding chu ahoptoh peh'in achapa Herod Archelaus (23 BC – AD 18) chu lengthah ding leh Judea, Samaria le Idemea a dingin apansah'in (4 BC-AD 6), Herod Antipas (20 BC-AD 39) chu Galilee leh Perea a apansah'in (4 BC-39 AD), Phillip (Herod Phillip II; 26 BC-34 AD) chu Iturea ah apansah'e (4 BC-34 AD). Hiche kihop toh hi Rome in apom peh'in, Archelaus chu Ethnarch ahisah'in, Antipas leh Phillip chu Tetrach ahisah'e.

JUDA KICHAI

Hiche hi Juda mite kichai ahilouleh chehchao kipatna ahitai. Juda mite chungna gamvaipo ho chu Juda mi ahilou jeh'un Judami lungsetna aneipouvin, achondanu, alungtup uleh ahou/atahsan hou ahethempeh pouvin, hijeh chun kimkhat achunguva agilou mama jengun ahi.

Hiche laichun Zealot kiti ho chu ahung hat mama jengun, amaho tahsan chu thahat sana Rome gamvaihom na'a kon chamlhat ding ahi. Akhatvei nan AD 6'in na ahin tong masapen un, hichu Quirinius in minsut ding thu apehlai ahi (Acts. 5:37). Seijui ho lah'a jong chun khat ajaovin amachu Simon ahin, chuleh Juda Iscariot jong hi anapang hidinga ginchat ahi.

Phatchomkhat jouvin gamvaipoho thanei lai jin Zealot hon Rome vaihom hotoh lhang phonga kidouna ahin neitaovin, adeh'in Felix (Judea gamvaipo AD 52-58) chu agilou mama jengin ahileh Zealot ho chun hadem ma adem uva anelkal dingin aumtan, amaho chun phat amu taphot uva Rome mi that dingin mansan aumtaove (Acts. 21:38).

Titus'in AD 70 kum April 9 nikhon Jerusalem chu a'um (kulpi kaikhum) panin, September lhabul lamin hou'in kelkot chu meija ahallin; hiche meikong nasatah chun Jerusalem houin songho geijin aka goijin, khopi sung mun chom chom jong akah than, mitamtah athatnin, akhopi jong asuse chai dehchetne. Hiche hi Judate kichaina chu ahitai.

BUNG – 10

JERUSALEM KHOPI

Bible'a Jerusalem akimu masat pena chu Melchizedek lengpa lengvai pohna Salem kiti khu hinte (Gen. 14:18) ti ginchat ahi. Israelten Jordan agalkai laijun hiche khopi hi Jebus mite lhang tin ana kihen (Josh. 15:8), Jebus khopi tin jong ana kihei (I Chr. 11:4). Hiche khopi hi Joshua phat laijah Israelten analo hih laijui. Ahin David lengpa phatlaijin David'in alo'in ama khopi din ana kisemin ahi (2 Sam. 5:5-7; 1 Chr. 11:4-7). Hitichun Israelte lenggam kikhen nung jengin jong Juda lenggam dingin akhopi'u ahijing nalaije.

Hiche khopi'a hin David chapa Solomon in hou'in ana san (I Kgs. 5-8; 2 Chr. 2-5), hitichun hiche khopi hi houthulam dolla khopi minthang pen ahung hidoh tai. Judate achonset jeh'un Babylon lengpa Nebuchadnezzar'in 586 BC chun ana lan, houin jong ana susen ahi (II Kgs. 25:1-11; 2 Chr. 36:17-19). Ahin phat phabep jouvin hiche khopi le houin sahphat le semphat ahung hikik tai (Ezra. 23:18; 5:1-6:15; Neh. 3-4). Hitichun NT phatlaijin jong houthulam dolleh kivaihomna lamdolla Judate din khopi khat ahung hipeh in ahi.

Jerusalem khopi hin kiminvo na jat chom chom anei jin: 1. Zion (Isai. 5:7); 2. David khopi (I Kgs. 2:10); 3. Khopi theng (Neh. 11:1); 4. Pathen khopi (Ps. 46:6); 5. Lengho khopi (Ps. 48:2); 6. Dihna khopi/khopi kitah (I Sam. 1:26); 7. Pakai khopi (Isai. 60:14) 8. Pakai umna mun (Ezra. 8:25); 9. Thaneipen Pakai chenna lhang molsangtheng (Zech. 8:3)

OT PHATLAIJA ISREALE TE DINGA JERUSALEM KHOPI MANLUTDAN

Mose henga Pathen'in ama mun leh ama chenna mun dingin ana lhenge (Deut.12:5,11,21; 14:23-24). Hitichun hiche khopi'a hin Pathen houna ding houin ahung kisatan, kut thupi dom jouse hiche khopia hin akimangin, Israel pasal jouse kumkhat sunga hiche khopi'a hi thumvei ache tei diuvin thupeh ana ume (Deut. 16:1-16).

Hiche khopi'a hin Pathen'in amite thu anahilin (Isai.2:3); chuleh amite chungah vai anahome (Ps. 99:1-2; 48:1-3,12-14). Israelte chu hiche khopi lam nga'a atao tenguleh sanpeh ding ana hiuve (1 Kgs. 8:44; Dan. 6:10).

Jerusalem molsangin akimvel chu Pathen'in amite aumpi vetsahna jong ahi (Ps. 125:1-2). Jerusalem'a aumlai chan uva Pathen mite chu Pathen angunga um dana kingaito ahiuve.

TU PHATNA CHRISTIAN HOUBUNG DINGA JERUSALEM THUPIDAN

Jerusalem hi Christian hou hung kiphudoh namun ahi. Hiche lai munna hi Jesu chu cross'a kikhajja nithum ni'a thoudoh kit ahi. Hiche lai munna hi Christian tahsan ho chungah thutep lhagaoheng chu hung kumlha ahi (Acts. 2). Hiche khopi'a konna hi vannoi leiset pumpi'a a kipana thupha hi kilhang sap pan ahi (Acts. 1:8; Lk. 24:47). Chuleh Jerusalem'a anaum houin chu houbung

masapen anahija seijui ho houin jong anahi'a ahi (Acts. 1:12-26; 8:1). Hiche khopi mama'a hi houbung sung thu'a kihouna anaum masapen ahi (Acts. 15:1-31; Gal. 2:1-10).

Hiche khopi'a hi phatkhat leh Pakai Jesu leh atahsan chate jouse kumsang lenggama vai ahom nahlai dingu ahi (Isai. 65; Rev. 230:1-6). Hiche jouteng chuleh lei Jerusalem hi vanna kichon ding Pathen khopi tonsot khopi hiding ahitai (Rev. 21:2).

BUNG – 11

JERUSALEM KISUHCHIM LEH JUDATE CHEHCHAO

Judaten Messiah ana san lou'u hin achunguva genthei natin cheng ahin lhutne. Jesun loupitah'a Jerusalem alutni'a aseis sa bangin (Lk. 19:42-44) chuleh akijoh doh le athi na ding anailama Jerusalem kisuh set ding aseisa bang chun (Lk. 21:20-24), Israelten Messiah ana tahsan lou jeh'un gimbol na nasatah ana chang taovin ahi.

AD 66 kuma Rome lenggamin Juda chung kaitam tah tah adon jeh'un ana kiphinun, Rome sepai khopi ngahho amathat'un ahile Rome lunghanna achunguva ahung lhung tai. Syria gamvaipo pan a Army ho ahin puijin Judate bantha ding atileh Juda mi akiphin le anabulu ho jeh'in amilhom utoh akile kitun, Jerusalem joh pal akai khummui.

Judea Gamvaipo Florus (AD 64-66) chun AD 66'in Jerusalem houin chu achomin, Jerusalem sung jong chu nasatah'in achomme. Judate chun hichu adem/anelkal (oppose) lneh jengun, hijeh chun Florus in hiche jona ding chun Rome sepai tamtah ahin puilutnin ahi. Ahin Juda ten abulu dinga hung sepai ho chu totnan ananeijun, houin sunga akiselun, ahin buluho akon kiven nadingin pal akikai khumui. Herod Agrippa II chun Judate henga chamna thu aseijin alungmon sah go'in, ahin hijeng jongchun boina sangtah sonan apang tan ahi. Hijeh chun Nero lengpan (AD 54-68) asepai lamkai Vespasian chu boina suveng dingin ahin sollin ahi. Ahin hiti'a boina aumjing laitah'in Nero ahung thitan Rome ten Vespasian (amintah Titus Flavius Vespasianus) chu Rome lengtah (AD 69-79) dinga ahin lhenu toh lhonin aman achapa Titus (AD 31-81; AD79-81 sung leng) chu Judea gamsunga kiphin na subei dingin ahin ngansen ahin dalhatai.

Titus'in AD 70 kum April 9 nikhon Jerusalem chu a'um (kulpi kaikhum) panin, Jerusalem muna Kalchuh kut le Cholsolou changlah kut mangdinga hung Judate asang aja chu aneh le chah dingu akhatan (cut supply) peh'in; Romanten abol ngaiji bangun khopi sunga umjouse chung kel alhah sah'in; nipi sung sese chun khopi chu aumchah to neo neova lah akopmin; akhon nan nipi kichai September lhabul lamin Judate chu houin sunga ale nolut kitnin, hou'in kelkot chu meija ahallin; hiche meikong nasatah chun Jerusalem houin songho geijin aka goijin, khopi sung mun chom chom jong akah than, mitamtah athatnin, akhophi jong asuse chai dehchetne. Hiche hi Judate kichaina chu ahitai.

Jesun 'Houin song suhchim louva khat chung khat kisetoph himhim um louhel ding ahi' tia Matthew 24:2'a aseis bangin Rome sepai general Titus chun Jerusalem houin bang jouse chu thing lentah'a kal (scaffold) adohkhuma, sangtah'a thing le akou thei adang dangho aset khuma, meija ahala; meikou chu anasat behset jeh'a songho jouse jong chu aka goi gam jeng ahi. Chule song akimat nalai ahalho (rubble) chu munchoma alhoh doh kitnuva, avoh khenuva akah lah'a sana kijepho chu alah doh kitnuva; chule song jouse chu Kidron phaichama apai mangu ahi.

Juda thusim jih Joshephus sei dannin “Juda mi 1,100,000 (Nelsom le sang jakhat -Hundred million/eleven lakhs) tha in aumin, sangtam tah kaimangin aumun, tamtah chu soh in johin aumun, kimkhat loi chu golnop bona’a sahang to kidel in apansah’un ahi” ati.

Pakai Jesun Cross akiput’a Golgotha mun ajot laiija numei alung natpi’a akap ho jah’a asei, “*O Jerusalem Chanute, Keima dinga kaplouvin nang ho dingleh nacha te dingin kap jouvin*” (Lk. 23:28) atile; Judate “*Hichepa (Messiah) thisan phu chu keiho chung leh kachateu chungu chuhen*” (Mtt. 27:25) atiu chu AD 70’a kipan ahitai. Hiche goh hilouva Judate chu Messiah asan loujeh’uva kumtam tah sunga mitlhin ajui jing ding ahi.

Kikhen cheh/kithechek hi Judate dingin thil thah ahipoi. Hiche hi Pathen’in achonset tenguleh semphatna ana manchahji manchah ahi. 722-721 BC in Assyria in Israel lenggam anakai mangin, chomkhat jouvin 586 BC in Babylon in Juda lenggam chu anakai mang kitnin ahi. Ahin Judaten Messiah apaiju le Jerusalem kisuh chim jouhin anat nao le bolgen theija aumnao naosonat chu ahung kipan tai.

BUNG – 12

JUDATE THOH GENTHEINA

Jerusalem kisuh mang jou kum 60 jouvin Juda mi themkhat agam uva kile kit dingin akigongun, ahin hiche hi vangset umtah in manthah najoh ahin, mi 5,00,000 (5 lakhs/half million) valin ahinna achan lo’un ahi.

Jesu atho kit le Jerusalem kisuh mang kihak lah’in Judate Christian tamtah songkula ana kojijun, that jong anathat’un, ahin tun amaho joh tha dinga hol ahitai. Amaho dingin songkul, soh le thina hi achan dinguva kilhengdoh danin aumtai. Khatvei chu Juda mi soh’a akijoh tam val jeh’in kailhang chu Juda mi in adim’in acho dingmi aum joupoi akiti. Ahin hiche jeng jong hi Mose in anaseisa ahi (Deut. 28:68).

SPAIN GAMMA JUDATE

Judate chu athoh gimlai jengun jong khantounan abop jingui. Akithe cheh’un, bolgentheijin aumun, kipah loutah’a aum laiijun amahon Spain gamma chomkhatna dingin vangam bang leuva nopsahna mun agalhungui. Hichelai chun Judate agam kimvela miho toh lekha simna lam ahin, sumkol veina lam ahin akhang touvun, chulai chun Juda Literature tamtah chu Hebrew pao le Arabic paovin boldoh in ahung ume. Mose Maiminides (AD1135-1204) chu chulai khanga dinga Juda lekha kijih thupi pen ahitai.

Ahin hiche jeng jong chu adai sot joupoi. Africa gamma Muslim tamtah’in Judate hinkho chu asu chavai lhek jengui. Chuti chun chunglang’a kon hinbulu hon Spain gam ahinlo kitun, Judate chu athahbeh’in mikhut noiya ahung um kit taove. AD 1492 hi Columbus in America agahol doh kum ahi jeng vangin, Spain gamma um Judaten Spanish terror ho jeh’a seijou lou gentheina anato laitah’u ahi. Ferdinand le Isabella thupuh dungjuijin Juda mi 800,000 (8 Lakhs) chu kong (ship) khatna ahengun athi dingin twikhanglen na alhauvin ahi. Hiti chun kum kichai masangin Juda mi athi moh chengse chu Spain gamma konin nodoh ahikitun, Spain gamma Judate sana khang (the golden age of Spanish Jewry) chu abeikit tai.

RHINE VALLEY'A JUDATE

Europe gamsunga bolgentheina jeh'a jam Juda mi tamtah chun Rhine Phaicham chu chenna ding phatah'in chomkhatna dingin aga nei kutun, Judate chu Europe gamsunga Homeland khat gakimukit abangun ahi. Ahin hiche mun jenga jong chun gentheinan ahintom pai kit taove. Crusader ho Middle East jon dinga hunghon Rhineland ahin hopa naova Pathen henga akitepna dungjujun Europe gamsunga Juda mi thathei chan athat'un, Middle East ahung lhunun ana toh'u ajom peh'un, amahon Judamite chu a Synagogue sungu kisan'a ahal lih denun ahi. Amahon Pathen henga ana kitep nao chu "Juda mi atam thei channa tha ding ahin, amaho gal satna aw cheng (battle cry) chu "Deus Vult" hichu "Pathen lungdei ahi" ti ahi. Hiche hi Christian ten anabol dinguva kilom loutah ahi vangchun, Christian kihisah'a galbol ho lamkai na'a Bible'a kihil hilou kibol ahi.

Judate chu aumnao jouseuva thilse soh ho jouse'a ngoh ahiuvin ahi. Mitamtah'in hichu ngolhoi tah'in ajuj jing nalaijun ahi. Kum jabih 20 lai jin Judate chu sum jouse chung a thunei danin ngoh'in aumun, gentheina jouse hinlhut in agelun, leiset chung pumpi losoh leh thanei din ginmo'in aumun ahi. Kimkhat chun Judate hin ima jouse aneiju (imajouse Judate'a) danin angaito'un ahi. Tuni chana Judate hi ima jousea ngoh ahiuvin, gamsung boina leh natna jenga jong ngoh ahiuve. Europe gamsung ana lo'a natna 'black death' kiti jeng jong chu Judate ngoh ahi. Judate chu atwi kul hou va poison gu hala ngoh ahiuve. Hijeh'a chu Judami sang tamtah tha'in ana umun, Juda kiloikhom (chengkhom) kho 200 lang nodoh'in anaum mun ahi. Hijong hi Mose thusei guilhun na ahi (Deut. 28:37).

POLAND GAMMA JUDATE

Rhine phaicham'a tamtah tha'a aum nungun Juda mi tamtah Poland gamsunga ajamlutnun, alengpa Boleslav the Pious (AD 1224-1279) le Casimer the great (AD 1310-1370) phat sahna dungjujin achenguvin ahi. Kimjabih 20'a Gallen 2 na'a akisuh genthei kah'un acheng jingun ahi. Poland gamma chengho chun mundet tah kimu danin akigelun, amahon a chondan'u ajuj pan kitnun, Pathen houna apan kitnun, tahsa kimanchah naho apankit taovin ahi. Hilai munna chun amaho chamlhatna nao khat akipe'in amaho le amaho thu akitan un, thilneo neo ho chu Polish court hilouvin amaho rabbinical court ah akitan jiuve.

Ahin kumjabih 18 langin Poland gam solam gamsese chu Russia langgam in ahinlokit tan, Judate khantouna chu alhasuh deudeu kit tai. Amaho chama kivaipohna chu lahdoh'in aumin, midang noi ja koi ahunghi kit taove. Judate chu leng thuneina neihon abolgenthei jun achenna dingun jong gam neocha, khopi neocha Russia le Poland gamgi'a chun ape'ui. Kumjabih 19 lai jin Czar Alexander III noi ja bolgenthei na chu thoh lel khop helin ahungumin, Russia sepaiten ahon honin tamtah tah athat kitnun ahi. Hitichun amoh chengse chu lhumlam'a ajamun, USA leh UK'a Juda mi um 75% chu Russia gam'a pat jamlut ngen ahiuve.

Japi kiloikhomna lam hihen sumle pai dinmun hijongle Judate dinga kha ahi jingin, achenna dinguva gam jeng jong phalpeh ahiji pouve. Khatvei chu Judate chu England le France gamma kona nodoh'in ahung umun, anei agou jouseu jong chompeh ahiuve. Houbung jengin jong Judami chu ima cha'a aman louvu goijong agoi louvu ahi. Chuleh Christiane chu Juda mite lah'a achen sah louvu ahi. Lateran Council IV (AD 1215) chun Judate chun badge jatchombeh Juda mi ahiu kihetna dinga abeh dingun thupeh aneijun ahi. England'a Judate chun thusom kijihna badge akibeh'un, German gamma leh France a a'eng (yellow) akibeh sah'un ahi. German'a Judate chu Gari/sakol kangtalai ja

tou phal ahipon, khopi alut ding tengu jongleh sum afeh'u angaijin ahi. Venice'a Judate chu atuma chen sah ahiuvin, agamgi munu chu *ghetto* (mi noinung le khutdoho umna mun) asah'ui. Russia a Judami chu kum 12 ahi hileh sepaija pang ding kum 25 sung pang teitei ding ahi. Amaho chu kai chombekh alahpeh'un, Juda numei khopi University centre muna umho chun akijoh ho melchihna (mark) akibu dingun ngeh ahi.

Judate genthei dan hi alhing keija seihah satah ahi. Judate gentheina hi tijat um tah leh gimnei tah ahi. Cossack Rebellion lai jin 10,000 tha in aumun, New York khopi'a King John thupeh in nikhat sungin 1500 tha'in aumui. America jenga jong Judate chu totnopna leh daichatvai jin aneijun ahi.

ACHOM LAMA JUDATE GENTHEINA:

Mi som le ja ho bep gentheina le thina tailouva a sanga sima agentheina houchu:

- AD 50, Judate leh Roman te kiboina'a thi chu mihing 30,000 ahi.
- AD 70, Jerusalem kisuhmanga kiholmo chu mihing 40,000 ahin, mi 100,000 val akisumangin, mihing 97,000 sohchangin akikai mange.
- AD 135, mihing 580,000 midang danga kon suhmangin ana'ummun ahi.
- AD 1020, Camite ten Juda mi jouse England'a kon anano doh'ui.
- AD 1272, England na kon mi 16,500 ana jam doh'un ahi.
- AD 1306, France gamma kon mi 100,000 nodoh anahin, khotdo anakisoi.
- AD 1648 Cossack rebellion lai jin mi 1,00,000 tha'in ana umun,
- AD 1939-1945, Gallen ni na a Adolf Hitler'in Juda mi 6,000,000 anathatne.

BUNG – 13

ISRAELTE HUNG KIKHOP TUP KIT

Israelte chehchao dinghi Masanglai peh'a patna themgaoho thusei guilhunna ahi banga ahung kikhop tup kit dinggu jonghi acheh chao dinggu seipa mama'in anasei sa ahitai. "...Israelte thechah Pa Ama mama chun ahin khop khom kitding, chuteng le ama chu kelngoi chingpan akelngoi hon achin banga achin ding ahi" (Jer. 10:31; 30:11; 31:35-37...). Namhohm cha akithe cheh hochun ahunglung ding nikho'a kisuh tup na ding kicheh tah'a anei jeh'u chun muntin le gamtinna hotbolla aum jeng vangun koiman asumang jou tahtah pouve. Israelte chu muntinna akithecheh jeng vangun mon mangthei louvin, Jonah ngapi sunga aum jing bangin ahing jingui. Israelte chu hiti chun Pathen thutep bangin kum 1800 vel amang thah bangin anaumun ahi.

ZIONISM HUNG KIPAT

Masang chun hiche kiloikhomna hi "Hoveve Zion" or "Lover of Zion" ana kitin ahi. Hiche hi leiset chungu Juda nam jouse lah'a Palistine'a hung kinung le kitna dinga mihen lungthim tilkhoh tah ahi. Kiloikhomna anina chu "Bilu" akitin, amahohi Palistine gamsunga analut saho, Palistine gamsunga natong saho ahiuve. Judate agamsunguva ahung kilekitna dinguva kiloikhomna hi neocha in kum phabep ana ume. Ahin 1895 kummin hichehin mikhat Theodor Herzl lungsunga meikong banga pohnatna ahin neito lhonin kikhelna lentah ahung ume. Aman amu dola Judate hi muntin aumna jouseuva mimuda leh hot hiuva ahin, hijehchun mipite lungchang jouse sukha dingle Israel state hung umkitna dinga natong lentah dingin lekha pheng jakhat ahinbol doh'in, amin chu

“Derjudenstaat – Jewish state” ahinti. Akipat pat patnan aman “Judate gam neidinga lungtup neichan chun gam aneiding ahi” ati.

Hitichun Theodor Herzl in World Zionist Congress chu Basle – Switzerland munna ahin khompanin, chua chun Palistine gama hung kile kitna ding lunggel luhna neiho chu “ZIONIST” tin ahung kihe taove. Theodor Herzl chu International Executive in lhendoh ahin, hi’a chun amahon Israel flag (ponlap) jeng jong ahin semdoh’ui. Hiche hi 1897 kum ahin, meeting kichaijin Herzl in a diary’a “Keiman Judate State chu kamutai. Ahin tunin tileng mijousen einuisat ding ahin, kum 5 sung, dihtah’a kum 10 sunga kadih’e ti chu kimudoh ding ahi” tin ana sune. Kum 50 lhin ding kon Nov. 29 1947 in United Nation in Israel State um ding chu phatsahna aneijin, May 1948 in Israel State chu ahung pengtai.

Kum 8 sungin Herzl in leiset chungga miminthang ho akimupin, aman Europian gama athahat hochu akitohipi dingin angeh jinge. Aman amasapen na German’a kinepna aholin, ahin amulou phatnin England ah aholin, 1903 kummin British’in Judate chu Africa’a Uganda chu achena dingvin apei. Ahin Judaten Africa chu adei pouvin, ahin England in Judate chun gamtum chena neithehi ahiu chu ahetpeh’un ahi. Hijeng jongchu Theodor Herzl in galjona nasatah’in alai. Hitichun Ezekiel themgao (Ezk. 37) na’a athilmu bangin lhankhuh ho’a patnin gu kikhensaho chu ahung kijop khom pan kit taove.

LEISET GALLEN KHATNA/GERMAN GAL (First world war: 28 July, 1914 – 11 Nov, 1918)

Zionism kiphudoh’a kona kimudoh chu, Judaten Jerusalem chu ahaimil tahtah uva achenna munho, adeh’a lhumlam gama chu chengden nom joh’u ahitai. Ahin Hrezl lekhabu leh athusei chun mipi tamtah lungsung asukha’in apu apa teu chenna gam jonin ahung pan taove. Hiti’a hungcho chu atamjo jilai ahiuvin, ahin adeilhen nao gama jilding akilhenu chu hahsatah ahi. Palistine chu Turkey noiija um ahin, agamsung chu thinglhang anasoh gamtan, mun tamjo chu gamthip ahitai. Phat ahung cheche’in jilna sang nei ahung lhung pan panun, loubolna langa them, twilah nalanga them, insahna lampanga them, khol (factory) langpanga them, lekhatem, lunggel them ho ahung lhung taove. Kum 1914 in Juda mi 100,000 tobang Palistine ahung lhungtaovin, atamjo chu Jerusalem vella’h’a ahung chengui.

Judate dinga leiset gallen khatna chu dei umlouhel ahi. Milhom cha ahi nakah uva agamuva boina ahungum ding chu Judate dinga tijat umpen leh agamu apen masanga athi dingu leh Zionism amanthah ding chu ahitai. Turkey chun Germany to kitho in Palistine’a Judate chu suhmang dingin lunggel aneijin, Judate gamsunga anatoh’u chu khatan’in aumin, kimkhat chu agamuva konin toldoh’in aumun, kimkhat ada achamlouvin Turkey gami hina lahsa’in aumun, tamtah tha’in aumkit nun ahi. Leiset gallen laiija Judate boina kit khatchu Judate apanna dingu ahikitne. Judate chu alangni’in apangun, Germany’a um ho German langa apangun, British’a umho chuti man British langa apang kitnui.

Leiset gallen khatna’in Judate agamuva achena dinguva kon boina ahin lhut jeng vangin aphanatna jong aume.

Akhatna: Balfour Declaration ahi. Judate Allies langa apan nom jallu leh Suez Canal langa apan jalun, British Foreign Secretary Arthur James Balfour in Nov. 2, 1917 in Lord Rothchild koma British ten Zionism chungga apohnat thu ahetsah’e. Hitichun British ten Israel state kitem dohna dinga

apanpi nao chu muntinna phonjalín ahungme. Balfour Declaraton kiphondoh chun Judate kiphaldoh (volunteer) hon Great Britian leh gamdang dang adeh'a US kithopi nomna ahin nei doh'un, Gallen khatna'a Zionism mang dinga agel'u chu Judate gamneina dingin panlahnan ahung pange.

Anina: British General Allenby in Jerusalem lo ding ahin got leh alungtup molso dinga aum chu ahi. Balfour Declaration chu Nov. 2, 1917 na kiphong doh ahin, lhakhat jouvin General Allenby in Jerusalem chu Turkish te vaihopna noiija konin achamlhat sah'e (Dec. 9, 1917).

Athumna: Dr. Weizmann (Chaim Weizmann) in apohkeh thei (Bomb) ahin semdoh'a British te ahuhdoh jeh'a lhangphong le sangtah'a pachatna kipe chu ahi. Dr. Weizmann chu British ten kipa thilpeh ding agotnu chun aman thilpeh sanglouva angeh chu "Keiman keija dingin ima kadeipoi, Kamite dinga thilkhat nabolpeh dingu chu kadei ahi" atin, Palistine chu Israel state hidingin athume. Hitichun Weizmann chu Israelten gam ahin mumun President masapen ahung hi'e.

FIRST WORLD WAR LE SECOND WORLD WAR KIKAH

Gal ahung kichai to lhonnin "League of Nation" ahung kistem doh'in, amahon Balfour Declaration dungjuijin Israelte gamtum neiding chu ahin sanpeh paijun ahi. British President Woodrow Wilson dei dungjuijin Palistine gam chu chomkhat chamlhat tah'a akipoh theina ding masangun British noiija umhen ti'a aseito lhonin noppeh ahin, hichun Juda mite akipa sah lheh'e. Ahin Judate chun akinepna banguva chelha thei deh louvin boina ahin toh kittaove. Judaten alunggellu guilhuna dinga khangkhat angakit'u angai tai.

British ten Arab to kikah lah'a chamna aumthei teina dingin Judate chu lhomcha bou akichaolut theina dingin kot ahon peh'ui. 1930 kumin loubol le chenna lampanga them (agriculturist & engenering) Sir John Simpson chun Palistine gamsunga Arab te nodoh louhella 20,000 bou hungcheng lut thei dingin aseije. Hiche laiija chu Arab mi 850,000 leh Juda mi 170,000 Palistine gamsunga chengbep ahi. Hitichun Israelte alunggelu guilhung theilouvin Leiset gallen nina chu ahung lhungkit tai.

LEISET GALLEEN NINA/JAPAN GAL (2nd World War: 1 Sept. 1939 – 2 Sept, 1945)

Pathen'in Abraham koma anakitepna bangin Judaten leiset chunghi alodim mamau ahitai. Judate chu leiset chungga dinga 1% bou ahi uva chuleh muntinna muda chang ahijeng vangun, Judate hi phatchomna le thilbol theina neitah ahivu. Lungchang natna neiija digitalis mangho chu Ludwig Traube thilbol dohsa mang ahivin, Typhoid (khosih) veija ahung damdoh hochu Carl Koller thilboh dohsa mangcha ahivu. Diabetes (Junlhum) veija insulin mangcha ho jong Minkowsky thilbol dohsa mangcha ahivin; amaho hi Juda mi ngen ahivu. Hiti'a chu Judate chu mitamtah dinga vangboh channa leh hindohna ahi jeng vangun achunguva mi kimkhatnin hotna lunggel aneipao chu amang theipoi. Judate chu vangboh channa ahijeng vangun mi dem leh seiset ahivin, gou manlutah ahijeng vangun boina atoh jingun, mikithopi tah ahijeng vangun achena chanuva boina semdanin alangin, achomlama seidingin "Judaten ahin pohlutnu phattheina chu dei ahi vangin, amaho chu dei ahipouve".

Hitler noiija Juda/Israelte Gentheina: Adolf Hitler (AD 1889-1945) Germany Dictatorpa (1933-1945) leh anungjui (Nazi) ho chun Judate ahot danu chu lhangphong tah'in akiphongin, a'im pouve. Nazi (National Socialist German Workers' Pary – Nationalsozialistische Deutsche Arbeiterpartei; founded by Anton Drexler in 24 Feb., 1920) akiphudoh uva 1920 kuma athuphon

doh'u chu "German mi hilou chu gammi hina chang ngailou ding, German mi chu ipi pao tho hen, ipi jui jongle German mi hiding, ahi. Hijeh'a chu Judate chu German mi hithei himhim lou ding ahi" ti ahi. Hitler'in German'a thuneina ahin neito lhonnin Judate dinga achan diuchu namdet ahi paitai. Masanga le nunga ho tamtah bangin Hitler'in Judate chu boina jousen angoh'in, Treaty of Versailles (First World War kichai na dinga kichamna kibolna) jong Judate document dannin agellin, German gam sumle pai lhahsamna jong Judate jeh, Leiset chungu Communist hungpen doh jong Judate jeh ahi ati. Aman Judate hi leiset chungu gam jouse le German te chungu thunei som danin amui. Hijeh chun Judate chu Hitler dingin themmo na jouse nejia leh themmo na jouse hungkondoh na danin aumtaove. Hijeh'a chu Hitler khutnoija athoh naochu mihem kibolna lah'a asangpen hung hija ahitai.

Hitler'in Judate ahin suhgentheina chu 1933'a a Office alojou jouva kipan ahi. Arp 7, 1933 in German gamsunga Juda khamnei/service nei jouse (Government Official, Doctors, Lawyers leh Office dang danga panmun nei jouse) haisah ahi. Chomlouvin lhathum sungin Juda insunga dinga aluboh cheh 30,000 tobang neilegou, sumlepai jin ninglhin lelina ahin neitaove. German ten Judate ahot dehset nau jong chu German sepai hon akijot teng asah jiu la'a kona jong mudoh thei ahi. Alachun "Judate thisan chu chema kon avat lhah teng ima jousen ahoina lam amano ding ahi (when Jewish blood flows from the knife, things will go much better) ti ahi.

1938 in Judate houin (synagogue) jouse hal ahin, Judate chenna in mutthong jouse suhset ahin, themmona neilou Juda mi 25,000 chu concentration camp (politic le gal jeh'a songkul lut, phate kikoi lou namun) a koi ahi. July 1938'a gam 32 kiloikhom hon kikhopna anejuva Juda mi huhdoh ding agot jeng vangun Judate chu athi gamna dinguva kiseipoh ma abang cheh joui. Kikhopna kichai ni'in Judate German le Europe gamsunga umjouse chu koiman neile gouva akithopi thei louding, Judate hiche gamsung dalha nom chun apotna dinga ngaicha (sumle pai) amahon akipoh doh dinga ahi. Hitler'in la Germany gamsung chu koimachan dollars 5 chunglam akipoh'a adalhah thei loudingin thu apekitnin, kihouna chu panna bei asoh'e. Hiche kihouna hin Judate sochatna ding kot akhagoh hilouvin, gamdangho jouse jong akamu asip ahitai. Hitler'in Judate boinahi chomlouva kisu mangding ahitai, Judate hi kisumang gamding ahi ati.

Japan gal hi Judate ding dehsetnin hetjing ding thusim asoh doh'e. Hitler'in Judate achutibol genthei jehchun muntina Judate jouse Hitler gallel na dingin akisa lunggim soh keijui. Kum 1939'a England in Germany chungu gal abolchun Palistine'a Juda mi 450,000 lah'a 130,000 chu British to pangkhoma gal boldingin ahung kipedoh'ui. Judaten British ten agamsung alutna dinga kona akhauva akiboinao chu anasoh lou abahsah leu jengun (asumilun) galchu asatnui. Leiset gallen nina a chun Judate banga thoh genthei ding aumpoi. Gal akhoh cheh cheh le Hitler'in Judate abolna jong asang cheh cheh'in, Hitler'in gam ahalo cheh cheh le Judate chu alol changu hakikhi cheh cheh danin alangin, gam aha lah chanun Judate chu asang asanga simin agenthei atam cheh cheh'ui. Hiche jong hi Mosi thusei (Deut. 28:47,48) guilhun na dinga soh ahi. Judaten Hitler noija aneisunu chu gilkel, dangchah leh sagoh keuva um hi ahijenge. Amaho kitha nadingin In jeng jong akisa in, Hitler thusei danin hiche hi Judate boina "Suhlhapna" ahi ati.

Germante Russia alutnu chun sepai honkhat chu mithat ding mong monga soldoh ahin, atha dinga chu Judate ahi. Amahon lha 5 sungin Judami 500,000 athatnui. Hitler'in Judate thana ding mongmongin Concentration camp tampi asemboh'in, hichu: Westerbork, Vught, Bergen-belsen, Buchenwald, Dachau, Grossrosen, Mauthausen, Ebensee, Theresienstadt, Sobibor, Auschwitz ho ahi. Hiche munho chu nikhat sunga Juda mi 10,000 kitha theina mun cheh ahi. Tremblinka hi ahileh

nikhat sunga mi 25,000 kitha theina mun dinga kiseum ahi. Hicheho goh hilouvin mun dang danga aneoneo jong tampi aume.

Hitichun Hitler in 2nd world war sungin Juda mi 6,000,000 (million gup/lakhs somgup/Nel gup) atathne. Judaten amaho'a dingin agamsung uva achen tilou nopna aumpoi ti ahin hechenun taove. 1939 kuma Europe gamsunga Judate chu 9,739,200 ahivin, Hitler in amaho chu 3,505,130 bou aso'e. Israel chate chu Million gup val jen atha ahin, ahijeng vangin Judate chu ahing doh'un, Hitler vang athi tai. Israelte gentheina chu akichai naipoi, ahin lenggam thah ahin nei dinga chu apeng go ahitai.

LENGGAM HUNG PEN

Ezekiel in ahung lhungding Israel state thu anaseije (Ezk. 36:24). Ahin kumjabih tamtah ache nungin jong ahung lhung dehpoi. Ahijeng vangin Judate gamdel chu ache jinge. British ten agamsung lut ding anakha jeng vangun Judaten anai jingun, khokhat abolbe chanun kal khat amachal danin akigelun ahi. Hahsat lai kum 1929-1947 kah lah'in kho 94 akiphudoh be'in, chen na mum (Kho) 349 anei taove.

British Government'in Arab to kilung nopmo ding anomdeh pouvin ahi. Ajeh chu amahon Arab country ho'a kon thao akilah'uva, a pipe line hou themkhat nin jong Arab gamsung ajui ahi. British ten Israelte chu agamuva ache dinga aphal deh pouve. Hitichun Judaten doudalna ato jingjeh'u chun aguh in galbol dingin akigongun, British te chu agamsungu (Palistine) a kon nodoh tho ding agotaove. 1946 in British ten Judate genthei tamtah jehchun agamsung alutna dinguva kon akhamnao chu ahin lha'ong dom un; ahin hijeng jong chu Europe gamsunga asang sang umna ding helou hotoh tethei ahinai poi.

Hijeh chun Judaten amaho chamin aboinao chu sutlhap agotaovin, aguh in Palistine gama Refugee camp abolun, chuleh Europe gamsunga Refugee camp ahahsat nao chu leiset chung mite ahetsah'ui. Hitichun Judate chu Germany apat Palistine ahin jonun, masanga amelma'a anapang'a Italy te kithopi nan agamuva sollut som ahivu. Ahijeng vangin British sepaiten Twikhanglen'a kong analam tinun Palestine'a sol lut hilouvin Cyprus langa pui ahijo'un, chu koma Refugee camps tampi boldoh ahikit'e. Cyprus camps ho sehseh'a jong Juda mi refugee 26,000-65,000 aumun ahi. Judate chun aumna gamuva Arab tetoh akah'uva boina aneijing un ahi.

Hitia Palistine gamsunga tanglouva boina aumjing chu British te dingin khop aumtan, adeh'in Judate leh Arabte tanglouva abojuva akah lah'uva aumthei loujeh'un April 2, 1947 in British ten Palistine chu United Nation khutna apedoh taove.

November 29, 1947 in hoitah'a kholtohna aumto lhonin, United Nation in Palestine kikhena ding le Judate Independent na dingin vote ala taovin ahi. Hiche kikhena'a Judate gam chan ding chu neocha, agam thumu sunga hop 4 a hop 1 bou, mile som'a saobou ahin, mun tina kona bulu theina mun ahi. Ahin Judate chun Palestine gam kikhena chu Independent muna ahi tin kipah tah'in ana sangui.

Hitichun Israel gam kisemdohna ding chu May 15, 1948 dingin tep ahi. Ahin Judate gamnei dinga akinep naochu Arab ten suhboi ahin somun, gal ahin bol khum kit taove. Ahin Judate chu kiginglou ana hina kah'un Europe'a kona amanchah hin kipoh hou jengjong chu British in Judaten State aneito kah'uva man loudinga akhamu ahi. Arab lamkaiho chun hiche galhi Judate kisuh mangna gal hidingin akitep kit nalaijun, amaho gim le genthei tah'a Hitler khutnoija asochat jou'u chun Hitler

chom khatin ana nga kitnu abange. Ahin itobang tijat aumjengin jong Judate chun agamu hungpeng doh nading chun malam ano jingui.

May 14, 1948 ni jingkah'a British in kipun khomna lenggam Flag aloillah tolhonin nilhah langin Arab le Judate kah lah'a kidouna gal nasatah asoh peije. Hiche nikho nilhah lang pung 4 in David Ben-Gurion in Israelte Independent kiphon dohna chu ahin sim doh'in, Hichu Tel Aviv Museum'a konin phondoh (broadcast) ahi. Aman hiche phondohna asimjou tolhonin Israel state sunga cheng Arabho chun chamna lunggel aneikit uva, thakhatna khantouna lam adel khom dingun temna aneije. Hiti chun Israel gam chu ahungpeng dohtai.

JALLEN GALSAT

May 15, 1948 in Tel Aviv'ah pung 5:25 jing kah'a Ben-Gurion in United Nation chungu Israel state nei ding anop peh jala kipa thu aphon lai jin, athusei chu thil pohkeh ging nasatah'in ahin suboijin, chomkhat jouvun hiche khopi sunga hin vanleng apatin bomb khat ahung kisp lhai tin tin athusei ajopmin ahi. Hi'a pat chun chamlhat galsat ahung kipan'e.

Gamtam tah'in jalen galsat hi gamsung jalena dinga anasat'uva, jalena anei niteng'u leh aseijuva, thusim'a aneiju ahi. Judate'a vang kumtamta gal ahin satnun, akhon na Independent amu jouvun jong galsat ajompai paijun ahi. Naosonat hi min nao anei masang tengle bou aneija, nao aneidoh teng agimna asuhmila damji ahin, Israel dingin vang nao apen jouva naosonat kipan danin aume.

Hiche jalen galsat hi tijat umtah ahi. Arabte chun Judate chu ichanna manchah lama lhasam ham ti heleu gang chela pan lahna aneijuva galchu ajo dingu ahi. Arabte chun manchah adei jat jatu akichoh theiju ahi. Ajeh chu amaho gamtum nei ahiuve. Ahin Judate chu agamsungu dinmun le gamlhing nei nailou ahijeh'un choh sah phal ahipouvin, amahon leiset gallen 2na'a akilah doh'u manchah lhomcha bou chu aneiju ahi.

Hiche galla Arab to kiloikhom gamho chu: Egypt, Syria, Iraq, Saudi Arabia, Yemen, Lebanon leh Jordan ahi. Amaho hi kipun khomuva honlhom cha manchah jong neilou Judate chu akidoupiu ahi. Arab tamta jong hoitah'in apangun Judate chu lhaget sungin sanggup tha'in aumun, ahin akhonan galjo na chu Israelte'a ahithou thouve. January 1949'a jalen gal jouse akichai to lhonnin, chaotah leh lhasam tah Juda sepai te chun kidouna gal manchah hoitah tah le kidouna vanleng geijin ahin nei taove. Judate chu gal ajo'u va aki huhhing'u goh hilouvin agamsungu jeng jong mile 600 in akeh let beuvin, kidouna'a aphot chompi nao chu amahon United Nation in aphot hopja'a hop 21 (21%)a lenjo amu beuvin ahi.

Israelten gam aneijuto lhonna abol masat penu chu Judamite aumna jouseuva kona ahung lut thei dingu chu ahi. Lhaget sungin Juda mi 340,000 Israel gamsung ahung lhungui. Amaho chu gallai jengin jong ahung kitol lut jengun, June 1953 in gamsung'a refugee camp jouse kha ahi'in, miho jouse chu Israel state'a hinsol ahitaove.

Kum 1956 in amahon galkhat asat kitnun, ahin galjo na chu baitah'in ahangun, amahon gang chellin Gaza lhang lah alahpeh'un ahi. Kum 1956-1967 kakah lah'in boina aum jom jingin ahi. Egypt President Gamel Abdel Nasser, Arab te lamkai pa chu kilet sah tah'in Israelte suh mang dinga agot thu aseijin amaho chu twikhang len sunga le lutna, ahinnao chu aita'h'a suhmang dingin aseije.

May 15, 1967 Israelten Independent ahinao kum som alhin anniversary in Egypt sepai ho chu Sinai'ah akitol lutnun ahi. May 17 in Cairo Radio "Voice of Arab" in Egypt pumpi hi Israel pumpi sumang dinga gal bol dinga kigochai soh ahitai" ati. Nasser in United Nation peace keeping force ho potdoh dinga ademand to lhonnin May 30 nin hitin aphongdoh'e "Egypt, Jordan, Syria le Labanon sepaite chu Israelte gamgi'a Israelte kiatpi dingin koi ahin, anunguva Iraq, Algeria, Kuwait, Sudan le Arab gam jouse sepai ho adinge" ati.

Hichun gal ahung kipan'in hiche hi "The six day war of 1967" kiti chu ahi. June 5 in Israeli Jet hon Egypt te Airforce ho nasatah'in asuse'in, Israelte Sinai'a tollut ahin, Golan Heights'a le Jerusalem'a jong kidouna nasatah aumin, Russia in koima cha galla akikum louna dingun thupéh aneikit nalaijin ahi. Ajehchu ama lunggel danna chu Arabte galjou hung hidinguva agel ahi. Hitichun nigup sungin Arab force hochu nasatah'in aki nung chonun, Israel sepai hon Sinai leh Golan Heights alo'un, angailut'u akhopi luiju **Jerusalem** chu avelin Judate khut na AD 70 jouva patnin akhatvei nan ahung um kit tan ahi.

CONCLUSION

Israelten Pathen lung ato lou jeh'u leh akikouna banguva achon lou uva Pathen akoupau sanga thil dang le Pathen dang akhoh sah jalun, Old Testament khanglai jengin jong nasa tah'in mi noiya ana um jingun, sohchanga kai jin aum jingui. Achung chona akhoh pen penna Messiah ana pai doh'u leh ana tha jeh'un Pathen jepna lenpen chu ahangun AD 70 apat'in tha le matin ana um jingun, mijouse engbol, noise leh pampaijin ahung um jingun ahi. Ahin Israel hon lhomcha sohcha jingho chu ahung gal kai jom peh'un, Pathen namlhen ahi jalu leh Pathen'in achunga abolnom aum nahlai jeh'in tuni chan hin ahung hing doh'ui Ahin tuni changei le tuphat tah jengin jong Israel gamsunga chamna dihtah aum thei naipoi. Tu dinmun goh hilouva khonunga dinga jong Israelten Pathen'a dinga tohding tampi leh Pathen'a kon jepna tampi chan ding anga jing nahlai jui. Hichu Jacob hesohna (Jacob's trouble) ti'a kisei (Jer. 30:7), tribulation phatsunga agenthei dingu chu ahi. Hijongleh tuchana huhdoh'a aum banguva huhdoh'a um thouthou dingu ahi.

Israel lenggam kitun doh kitnan kon geldoh ding leh suhmil lou ding chu: Theichang na (Israel) chu ahungnou doh'a ahung hingdoh kit ahitan, Nipi (Pathen lenggam leh thutanna) chu anai mong mong tai tihi ahi.